



09836

二

太宗英文皇帝諱窩闊台一作翰哥台太祖第三子母曰

光獻皇后弘吉刺氏太祖伐金定西域帝攻城略地功居

多初太祖議立儲嗣兄弟互推於帝語詳太祖諸子傳太

祖末年命帝將兵征西域踰葱嶺以西霍博之地聞太祖

之喪旋師來會踰年始至其未至以前皇弟拖雷攝國事

者一載

元年己丑金主守緒正大六年宋理宗紹定二年也夏駕

至忽魯班雪不只之地皇弟拖雷來見八月己未諸王百

官大會於怯絲連河以太祖遺詔即皇帝位始立朝儀皇

族尊屬皆拜頒大札薩漢言大法令也先是太祖初崩金

元史卷三 本紀

遣使弔喪至是復遣使歸太祖之賵帝曰汝主久不降致

先帝老於兵閒吾豈能忘也爾何為哉卻之詔曰我成吉

思皇帝艱難創立國家其未行德政宐及時建立其定算

賦中原人以戶計西域人以丁計蒙古以馬牛羊計各出

賦調編中原人為軍二十丁出一卒年二十以上者充之

蒙古人有馬牛羊者每百分輸一入官又輸一以膳其部

眾凡中原賦調耶律楚材主之西域以回鶻人馬合墨的

主之蒙古以色目親臣主之始置倉廩立驛傳凡諸王駙

馬聚會及差使來往不得科斂百姓可令千戶歲出備差

車馬到驛交替其沙磧無水草者相視可并處立營其在

官金帛器械倉庫宐置官簿籍典守毋得擅取蓋博爾朮

及耶律楚材之議也詔下頒行中外稱便以史天澤統真

定河間大名東平濟南五路漢軍劉巖統平陽宣德等路漢軍俱爲萬戶是歲印度木羅夷二國來會西域伊思巴刺城部長來降冬十二月大將赤老溫帥師圍慶陽金遣使阿古台來聘再歸太祖之贈復卻之

二年庚寅金主守緒正大七年宋理宗紹定三年也春正月詔自今以前事勿問定諸路課稅酒課驗實息十取一雜稅三十取一是春帝與拖雷獵於幹爾寒河遂益兵圍慶陽金副樞伊刺蒲阿等率兵來援戰於大昌原其先鋒完顏彝以忠孝軍四百騎敗蒙古軍八千蒙古軍遂解圍走自南北構兵二十年金始有此捷奏功第一於是陳和尚之名震中國授定遠大將軍世襲謀克忠孝軍皆回紇乃滿羌渾及中原亡命受募者驚很難制惟彝御之有方

元史卷三本紀

二

坐作進退皆中程式所過州縣秋毫無犯每戰則先登疾若風雨諸將倚以爲重

完顏彝即陳和尚也大昌原之戰陳極極薛應旗續編或係於正大五年本本金史忠義傳也或係於六年本金史哀宗紀也然元史此兩年拖雷監國太宗未即位金史本紀亦不書惟正大七年哀宗紀正月蒲阿等解慶陽之圍即此一事諸傳誤分慶陽大昌原爲二事又或以去冬圍城時爲今春解圍

時夏避暑於塔密爾河速不台及金將完顏彝戰於倒回谷復敗績士馬填塞谿谷幾滿完顏彝欲追擊之金諸將謂不如釋之以爲德遂不追時蒙古軍攻京兆鳳翔者皆潰退數日後知金無追兵復聚而圍鳳翔金元帥蒲阿旣連解慶陽鳳翔之圍志氣驕溢遇使臣幹骨爨往蒲阿遣歸告以整兵待戰帝震怒遂決計南伐蒲阿之馭軍也無法好趨小利嘗一日夜馳三百里剽掠今日得生口三百明日得牛羊一二千士卒喘死者則不問完顏彝嘗因宴

會面斥其失蒲阿不能改彝曰國家兵力必壞於此人之
手吾權位不敵惟以死報國而已秋七月帝自將征金詔
曰朕蒙席成業無功勞於國家惟茲金國尙阻聲教未究
皇考之緒朕宜親征以終前烈其令朕叔父幹赤斤大王
畱守和林老營其皇考所征西域未下者有巴赫塔部及
康里欽察十一部今宜濟師繼往諸王在內者以巴圖爲
長在外者以古余克爲長凡進征之諸王駙馬萬戶千戶
百戶均以長子出行庶人馬多氣勢盛敵人畏懼爾諸王
駙馬將士其各勛哉皇弟拖雷皇弟子蒙哥率師從拔天
成等堡遂渡河攻鳳翔八月金降將武仙復歸金金復以
爲恆山公置府衛州蒙古兵圍之金完顏合達來援完顏
彝先登蒙古軍皆北史天澤以千人繞出金兵後夾攻之

元史卷三 本紀

三

仙敗走天澤遂取衛州冬十一月立燕京宣德西京太原
平陽眞定東平北京平州濟南十路稅課所設使副二員
詔諸路州縣長吏專理民事萬戶府專總軍政課稅使專
掌錢穀各不統攝是月師攻潼關藍關不克十二月拔天
勝寨及韓城蒲城

三年辛卯金主守緒正大八年宋理宗紹定四年也春正

月師圍鳳翔金主遣完顏合達及蒲阿救之逗畱不進二

月遂克鳳翔舊史此下有攻洛陽河中諸城下之之語案

河中何得此時夏四月金將完顏彝復以忠孝軍敗速不

先下邪今不取台於倒回谷帝召責速不台旋復使從皇弟拖雷南伐夏

五月避暑於九十九泉帝議分南北軍夾攻金約會於汴

先命拖雷出師南路拖雷遣朔不罕使宋假道淮東以擣

河南從太祖遺命也宋統制張宣誘殺之復遣李國昌使宋需糧秋八月幸雲中始立中書省改侍從官名以耶律楚材爲中書令粘合重山爲左丞相鎮海爲右丞相是月以高麗殺使者命薩禮塔率師討之取四十餘城高麗王瞰遣其弟懷安公請降薩禮塔承制設官分鎮其地乃還拖雷聞宋殺使臣怒曰彼昔遣苟夢玉來今何遽背約耶卽移師伐宋破興元入大散關直趨饒風關宋軍民散走死於沙窩者數十萬冬十月帝出師北路圍河中府拔之十二月拖雷兵三萬渡漢金諸將欲邀擊於半濟蒲阿不從拖雷遂引兵全濟畱輜重以輕騎先進戰於禹山明日潛兵光化林中金人偵之四日不聞音響合達蒲阿遂引兵就糧鄧州蒙古兵襲其後隊金兵幾不成列夜二鼓始

元史卷三 本紀

四

入鄧州城金帥隱其敗反以大捷聞汴京解嚴不設備四年壬辰金主守緒天興元年宋理宗紹定五年也春正月戊子帝自河中用西夏人恤克計由河清縣白坡濟河攻洛陽下之遣人馳報拖雷軍拖雷亦已渡漢江遣使來報卽詔諸軍進赴新鄭金元帥合達蒲阿等以步騎十五萬援汴拖雷以鐵騎三千更番擾之金兵且戰且行晝夜不得飲食休息距鈞州三十五里蒙古北路軍前鋒亦會乘大雪合擊夾攻於三峯山俟其困憊開鈞州路縱之走金軍潰聲如雷獲其大將蒲阿翼曰帝大軍至會攻鈞州獲其元帥合達於城中其裨將完顏彝死之金盡徹潼關藍關守兵入援其守將李平以潼關降師遂長驅入盡下高虢嵩汝陝洛許鄭陳亳潁壽睢等州三月遣使諭金主

曰汝所恃惟黃河與完顏合達爲長城今我已渡河殺合達更何所恃邪金主遣其兄子曹王訛可入質帝及拖雷北還畱速不台守河南圍汴金臣議以汴京外城不可棄仍舍裏城守外城外城周世宗時取虎牢土所築礮不能入惟周圍百二十里備多力分糧少夏四月金降將國用安叛歸金金封爲堯王帝出居庸避暑官山時金有大礮名震天雷以鐵罐盛藥以火發之其聲聞數十里所蒸圍半畝以上其所著鐵甲皆透蒙古兵冒牛皮至城下掘孔城上以鐵繩懸雷礮緹下火發人與牛皮皆破迸無迹又有飛火槍注藥以火發之輒前燒十餘步蒙古惟畏此二物攻城十六晝夜內外死者百萬計速不台乃爲好語曰兩國已講和更相攻邪金主就應之遣官出城以酒炙犒

元史卷二

本紀

五

軍且賂以金帛珍異速不台乃許退兵避暑汝州高麗叛殺所置官吏徙居江華島復遣薩禮塔征之秋七月帝不豫拖雷禱於山川請以身代遣唐慶使金諭降金殺之和議遂絕八月金主畱軍守汴自將出都如河北速不台敗金恆山公武仙援軍於汴城外使宣撫王檝至宋約共伐金宋遣鄒伸之報謝約成功後以河南歸宋九月帝瘳北還拖雷薨於中途帝還龍庭冬十一月獵於納蘭赤刺溫之野十二月詣太祖帳殿

五年癸巳金主守緒天興二年宋理宗紹定六年也春正月金主濟河攻衛州兵敗復走河南入歸德金西面元帥崔立殺畱守等官以汴京降二月幸鐵列都之地皇子貴由及國王塔思諸王按赤台等討平完顏萬奴於遼東萬

奴金宗室據遼東十九年至是始滅語詳收復東北諸部
傳夏四月速不台軍進至青城卽金受宋降之地也崔立以金太后
王氏后徒單氏及梁王從恪荆王守純等五百餘人至軍
中速不台殺金二王及其族屬送金后妃等於和林遂入
汴京速不台奏請屠之耶律楚材入朝力爭乃詔除完顏
氏一族外餘皆原免初大將撒吉思不華及帖木爾台帥
兵取金睢州遂圍金主於歸德府或獻決河灌城之策河
既決從西北下至城南入故睢水城反以四面環水爲險
固不能進攻索獻策者已不知所往乃退屯亳州至是金
將富察官奴密陳斫營之策佯遣使詣軍前納款以求其
母爲名誓劫金主以降乘船會議中流往返數次官奴探
知王家寺帥帳所在夜率忠孝軍五百攜火攻具登舟殺

守堤邏卒分軍出柵外腹背夾攻火槍雷震蒙古軍大潰
焚溺死者三千餘遂解圍拔營回亳時金主繫舟北門以
待慮不勝則走徐州及天明大捷始回城官奴自破蒙古
軍後恃功跋扈無上居金主照碧堂諸臣無一人敢奏對
者金主決策欲遷蔡州官奴復言不可金主與左右謀伏
兵斬之遂奔蔡州塔察爾率師圍蔡括中州戶得七十三
萬餘冬十一月宋遣荆鄂都統孟珙以兵二萬糧三十萬
石來會伐金冬十二月諸軍與宋兵合攻蔡取唐州敗武
仙於息州金人以海沂萊濰等州降是冬徐州軍降國安
用自殺敕建國子學於燕京頒宣聖玉牒修渾天儀
六年甲午金主守緒天興三年宋理宗端平元年也春正
月師及宋師攻蔡州州恃潭爲固外卽汝河潭高於河五

六丈至是決而注之實以薪葦遂濟師徑攻北門宋將孟
琪攻南門頃刻萬眾蟻附而登城遂破金主先一日自盡
於幽蘭室翼日城中諸將縱火自焚死金亡與宋約和以
陳蔡東南地屬宋各引兵退立北平汴梁等處鎮守官而
還金主嘗言蒙古所常取勝者恃北方之馬力資中原之
技巧朕實無如何若如宋人朕得甲士三千橫行江海矣
是春帝會諸王宴射於幹爾寒河夏五月駐蹕達蘭達巴
之地復大會諸王百僚頒條令曰凡當會不赴而私宴者
斬諸出入宮禁各有從者男子以十人爲朋出入毋得相
雜軍中凡十人置甲長聽其指揮專擅者論罪其甲長以
事來宮中卽置權攝一人甲外一人二人不得擅自往來
違者罪之諸公事非當言而言者察其耳再犯笞三犯杖

元史卷三

本紀

七

四犯論死諸千戶越萬戶前行者射以木鏃百戶甲長以
下有犯其罪同凡來會諸軍甲內不足數於近翼抽補其
來會者用善馬五十匹爲一羈守者五人飼羸馬三人守
乞烈思三人

乞烈思繫馬所也

盜馬一二匹者論死諸人馬不應

絆於乞烈思內者沒與畜虎豹人諸婦女製只孫燕服不
如法者及妒者乘以騾牛徇部中論罪卽助貲更娶秋七
月宋人背盟初來會破蔡州時約分蔡州以南爲宋蔡州
以北爲蒙古各解兵反國時汴洛空虛宋將趙葵等議乘
諸軍北歸襲取中原扼關守河爲恢復計宋丞相鄭清之
惑其謀言於宋主遂遣趙葵全子才等率兵六萬攻汴行
省李伯淵殺崔立降於宋宋將徐敏子西攻洛陽蒙古戍
兵先期空城去宋兵糧盡引還諸軍追擊大敗之速不台

還師來赴決黃河寸金淀水灌宋軍多溺死趙葵全子才等棄汴遁於是上決計南征令以胡土虎爲中州斷事官遣達海紺布征蜀是秋遣國王塔思伐宋冬十二月再遣使王楫詣宋責敗盟宋復遣鄒伸之報謝自是江淮閒無寧日

七年乙未宋理宗端平二年也春城和林作萬安宮爲會

同之所建城周五里設宮闈立驛傳以便貢輸命皇子貴

由皇兄子拔都按拔都卽朮赤太子之子也太宗時但有

斯殆亦拔都之始封與皇弟子蒙哥征西域皇子闊端征秦鞏皇子

曲出及胡土虎伐宋命唐古征高麗秋七月命諸王叩溫

不花攻江淮張柔略漢口冬十月皇子曲出拔宋棗陽軍

遂徇襄鄧入郢虜人民牛馬數萬而還十一月皇子闊端

元史卷三本紀

八

攻石門金都總帥汪世顯降遂入沔州時金旣亡惟秦鞏

二十餘州尙未下從耶律楚材言詔闊端招諭許以不殺

諸州皆降惟會州都總管郭斌文州知州劉銳固守及城

陷闔門死之命中書省臣契勘大明麻

八年丙申宋理宗端平三年也春正月萬安宮落成諸王

各治具來會宴初行交鈔以萬錠爲額二月命應州郭勝

鈞州李朮魯九住從曲出充先鋒伐宋以鄧唐均三州徧

襄陽敵境且歲荒徙其民於洛陽之西夏六月復括中州

戶口得續戶百有十餘萬初太祖銳意圖中原所得城邑

悉分將士至是始以民戶隸州縣秋七月以眞定民戶奉

太后湯沐此湯沐邑後歸睿宗子中原諸州民戶分賜諸

王貴戚后妃舊史后妃作韓魯朵卽窩里朵皇兄子拔都

平陽府皇兄察合台太原府舊作茶合帶皇子貴由大名府貴

舊作古與聲相近也食貨志大皇叔父孛魯古台廣寧府

名戶撥在定宗位下即貴由王子廣寧王位撥恩州戶即

食貨志太祖弟孛羅古帶大王子廣寧王位撥恩州戶即

此也但紀又有孛魯帶撥那州與志異豈誤分一為二人

歟錢大昕謂志中有入答子名下撥順德戶列於異姓功

臣乃哈刺合孫丞相之祖不當列於宗室親王之內故刪

之皇弟果魯干河間府聖撥河間戶即果魯干也皇從弟

淄川王野苦蓋都濟南二府戶內撥賜野苦哈薩爾太皇

叔父遼王幹陳那顏平灤州志作幹真那顏即太皇子闕

端鄆國公主及駙馬赤苦赤苦即赤窟鄆趙國公主阿刺

海昌國公主果眞國王塔思塔思原作查刺溫譯音殊也

文衍郡王鍛眞一作段眞一作端眞郡王蒙古寒札即芒

忽氏封郡王畏答爾國舅按赤那顏即按陳先鋒折那顏

之子寒札乃其名也國舅按赤那顏那顏也先鋒折那顏

伯也和斜朮和原作火食貨志作和斜溫竝於東平府戶

撥曹州戶皆異姓功臣也

元史卷三 本紀 九

內撥賜有差食貨志太宗是年所撥者耶律楚材言擾民

非便遂命各位止設達魯花赤朝廷置官吏收其租額之

非奉詔不徵兵賦楚材又請立編修所於燕京經籍所於

平陽編集經史召儒士梁陟充長官以王萬慶趙著副之

使釋九經進講東宮且令大臣子孫執經聽講秋七月闕

端率汪世顯等入蜀破斬蜀將曹友聞於陽平關遂入成

都招降潼川利州諸路冬十月皇子曲出薨於軍張柔攻

郢州拔荆門軍宋襄陽將王旻李伯淵來降以游顯領襄

陽樊城事遂進攻江陵

九年丁酉宋理宗嘉熙元年也春獵於揭揭察哈之澤諸

王拔都及速不台等征欽察別部康里破之禽康里酋巴

赤蠻進攻幹羅思拔其耶烈贊城夏四月於和林北七十

里築掃鄰城

掃鄰者宮門外
院官會集之處

作迦堅茶寒殿六月左翼諸

部譎言括民女帝怒因括以賜麾下秋八月令劉中楊奐
試諸路儒生分經義詞賦論三科中選者除本貫議事官
得士四千三十人冬十月獵於野馬川幸龍庭遂至行宮
是冬宗王叩溫不花等入淮西下光州略地至蘄黃宋懼
請和乃還是年始制軍符驛券給諸王百司印

十年戊戌宋理宗嘉熙二年也春塔思軍至北峽關降其
將汪統制夏襄陽叛將執游顯等降宋宋兵復取襄樊五
月於和林北三十里築圖蘇湖城作迎駕殿秋八月以諸
路旱蝗免今年田租仍停舊欠九月都元帥察罕率兵圍
宋廬州敗還冬以衍聖公孔元措言收錄金太常禮冊樂
器樂工始命制登歌樂又從行省楊惟中請建書院於燕

元史卷三本紀

十

京祠周敦頤程顥程頤張載朱熹

十一年己亥宋理宗嘉熙三年也春復獵於揭揭察哈之
澤皇子闊端軍至自西川秋七月游顯自宋逃歸八月元
帥塔海將兵入蜀取川北川東州郡尋引還冬十一月皇
弟子蒙哥率師圍阿速國之蔑怯思城閱三月拔之十二
月回鶻商人奧都刺合蠻撲買中原銀課二萬二千錠以
四萬四千錠爲額從之使領諸路稅課所

十二年庚子宋理宗嘉熙四年也春皇子貴由克西域未
下諸部遣使奏捷命張柔八萬戶分道伐宋按竺爾進兵
東川圖萬州敗蜀舟師於夔夏五月奉使王檝卒於宋宋
使來歸檝之喪冬十二月詔皇子貴由班師敕州縣失盜
不獲者官爲償之先是令民代償民多亡命今始罷之籍

諸王大臣所俘男女爲民

十三年辛丑宋理宗嘉熙五年也春二月獵於揭揭察哈之澤帝不豫醫言脈已絕皇后召耶律楚材問之對曰帝王修德可回天命今任使非人賣官鬻獄囚繫非辜者多古人一善言熒惑退舍請赦天下囚徒但非上命不可俄帝少蘇聞所奏領行之是夜醫候脈復生適宣讀詔書時也翼曰而瘳帝晚年嘗言朕自卽大位較皇考時多四善事一平定金國二設立驛傳三無水草處穿井立營四各城設官鎮守亦有四過失一沈湎於酒二聽婦人言取諸王部下子女三害諫臣多豁勒忽四牆圍野獸致所部怨言楚材屢規帝節飲不止乃持酒槽鐵口進曰麴蘖能腐鐵泥五臟乎帝悟敕每飲毋過二鍾然不能常節冬十一

元史卷三 本紀

十一

月四日帝將出獵楚材以太乙數推之亟言其不可左右皆言不騎射無以爲樂獵歸帳殿歡飲極夜乃罷果病五日而崩在位十三年壽五十有六葬起輦谷追諡英文皇帝廟號太宗帝有寬宏之量澆樸之質乘開國之運師武臣力繼志述事席捲西域奄有中原惟知諸子不材又知憲宗之克荷而儲位不早定致身後政擅宮闈大業幾淪有餘憾焉是歲以劉敏行尙書省於燕京高麗王王暉以族子綽入質汪世顯復入蜀圍成都守將田顯開北門納師斬宋制置使陳隆之

論曰太宗功業莫大於滅金定中原以終太祖之志雖然使金無可亡之道元豈能亡之哉金自章宗改大定之政壹以涼薄猜鋤宗藩援立庸憇啟強敵覬覦之心國勢已

不可久宣哀二帝以己強弩之末當敵燎原之初自非命世之材豈易望中興之烈哉然以人事言之有未可盡委諸天意者宣宗於胡沙虎梟獍弑逆之賊不亟正典刑申大義反感其援立之私委用無貳逮高琪以畏禍討殺胡沙虎則又委任高琪舍中都而南遷首激亂軍之變又不以中都專任承暉使輔儲宮固守而以抹撚盡忠擊之及至兩奸竝萃於汴京專議南侵宋以廣地而置河北於不問又築汴京重城營少室山爲御寨避兵而置關陝於不問及至末年始悟二人之罪而戮之而勢已岌岌矣哀宗之立勢更難於貞祐然行省大臣則有胥鼎力全河中之保障名將有陳和尚統忠孝軍屢奏大昌原倒回谷及衛州之捷且關中諸郡完顏合達守之木華黎亦屢攻而不

能入速不台力竭而思還又蒙古兵皆畏暑故太宗拖雷均已北去明汴城鞏固非人力所能攻破也從來艱難再造之主未有不躬親行陣以據形勢而一將士之心者誠使黜白撒蒲阿二人不用而自出關陝帥陳和尚爲中軍完顏合達爲左軍武仙爲右軍而專任胥鼎以河南河中轉輸之事據上游以臨中夏則鳳翔可不失陷而關中可保速不台不敢久畱而秦豫竟三行省可完矣乃明知陳和尚之才而使隸蒲阿爲偏裨知白撒爲人心所憤反陰敕禁軍防守及至諸軍盡覆汴城危迫累卵始議自將出師則已晚矣乃臨難訴哀自憾無罪亡國謂未嘗奢侈未嘗用小人豈知亡社稷於小人之手已非一朝一夕乎嗟乎自古無不亡之國而亡國亦從無不可挽之機若金人

者豈盡元人亡之也哉

定宗簡平皇帝諱貴由太宗次子也長子合失台早世故舊史以次爲長焉母曰六皇后乃馬眞氏以丙寅年生帝太宗嘗命從諸王伐金西征阿速及殲東夏完顏萬奴皆有功太宗嘗言諸子皆不足屬大事獨愛皇弟子蒙哥末年又屬意於皇孫昔烈門謂可爲嗣太宗崩皇后臨朝三年載無君內忌憲宗剛明而昔烈門又幼冲至是乃會百官於苔蘭荅八思之地議久不決諸王將謀亂會雷雨大作帳外水深數尺遂各散去后以貴由己所生且年長遂議立帝方帝之未立也后先稱制壬寅春六皇后稱制之元年當宋理宗淳祐二年耶律楚材爲相閱三年甲辰當宋淳祐四年楚材薨又明年乙巳始集諸王大將議立君此

元史卷三本紀

三

四年中漠北中原事皆無攷其見於史者惟元年壬寅耶律末哥攻蜀取瀘張柔渡淮攻宋滁和揚等州屠通州次年癸卯張柔屯田襄城成杞縣三年甲辰宗王按只台遣濟南軍元帥孟德攻宋濠泗蘄黃等州四年乙巳都元帥察罕等率步騎三萬會張柔攻壽泗盱眙揚州趙葵請和乃還及遣阿母罕征高麗克威州平鹵城而已

已上見定宗本紀

是時政在宮闈奸人奧魯刺合蠻以貨得政柄廷中悉側目楚材數面折之癸卯五月癸惑犯房星楚材奏當有驚擾居無何行都譎言兵起倉卒后遂令授甲選腹心至欲西遷以避之楚材言根本一搖四方立亂臣觀天道必無大患後數日乃定后嘗以御寶空紙付奧都刺合蠻使自書填行之楚材曰天下者先帝之天下朝廷自有憲章柰

何付之小人遂止又命刺合蠻所建白令史不爲書者斷其手楚材言國之典故先帝悉委老臣何與令史如不可行死且不避況截手乎且老臣事太祖太宗三十餘年無負於國皇后亦豈能無罪殺臣邪后雖銜之終以先朝勳舊深敬憚焉故主昏於上而政清於下綱紀不至大壞以上

見耶律楚材傳

定宗元年丙午當宋理宗淳祐六年秋七月帝卽位於和林朝政猶出母后冬獵黃羊於野馬川以權萬戶史權等耀兵淮南拔虎頭關寨進圍黃州二年丁未當宋理宗淳祐七年春張柔攻泗州夏避暑於曲律淮黑哈速之地秋西巡八月命野里知吉台率朔思蠻部兵西征是月詔蒙古戶每百以一名充拔都魯九月取太宗宿衛之半以耶

元史卷三 本紀

西

曲門答爾領之冬十月括人戶三年戊申當宋理宗淳祐八年春三月帝崩於橫相乙爾之地在位三年壽四十有三葬起輦谷追諡簡平皇帝廟號定宗帝崩後議所立未決或云定宗后擁皇姪昔烈門垂簾聽政者六月舊史后如傳或云皇太后乃馬眞氏復治國事陳桎續通鑑自後己酉當宋淳祐九年庚戌當宋淳祐十年連歲大旱河水盡涸野草自焚牛馬十死八九人不聊生諸王及各部又遣使於燕京迤南諸郡徵求貨財或於西域回鶻索取珠璣或於海東搜取鷹鵠驛騎不絕內外離心故無可紀然自太祖崩後拖雷監國者一年太宗崩後六皇后稱制者四年定宗之後皇后臨朝者又幾四年前後凡九載無君而國不亂卒能創業垂統上竝漢唐者則皆宗王宿將維持拱衛根

翰蟠據之力惟其事蹟則文獻綿邈無得而徵焉故附於
太宗本紀之後示不足紀也曰吾知元末一統以前三宗
而已

元史卷三

本紀

五

元史卷三終

憲宗

憲宗桓肅皇帝諱蒙哥睿宗拖雷之長子也母莊聖太后怯烈氏歲戊辰十二月三日生帝時有黃忽荅部知天象者言帝後必大貴故以蒙哥爲名漢言長生也太宗在潛邸愛之養以爲子屬昂輝皇后撫育之嘗攜之出獵遇大風太宗避入帳殿抱帝置膝上撫之曰是可以君天下一日使特牛按豹皇孫昔烈門曰以特按豹則犢將安養帝歎賞之曰是亦可以君天下故又屬意於昔烈門及睿宗薨乃命帝歸藩邸從征伐屢立奇功嘗攻葱嶺西北欽察別部曰康里者其酋巴赤蠻逃於海島帝追至其地適大風刮海水去其淺可渡帝喜曰此天開道與我也遂進禽

元史卷四 本紀

之乃班師而水已至後軍有浮渡者復與諸王拔都征斡羅思部至耶烈贊城躬自搏戰破之定宗崩朝廷久未立君中外咸屬意於帝而宵小忌其英明洵洵議久未決諸王拔都穆哥阿里不哥大將兀良合台速不台等咸會於漠北拔都首建議推戴時定宗后遣使巴刺在坐曰昔太宗有命皇孫昔烈門可君天下諸王百官皆與聞之今議欲他屬將置昔烈門何地穆哥曰穆哥即睿宗子末哥大王也太宗既有是命前議立定宗時何以不言是則違太宗之命者汝等也且蒙哥可君天下亦太宗之言今何獨不可遵邪巴刺語塞兀良合台曰蒙哥聰明材武年長且賢人望所屬眾悉唯之議遂定

元年辛亥宋理宗淳祐十一年也夏六月西方諸王別爾

哥及脫哈等東方諸王別里古台按只台及塔察爾等西方諸大將班里赤等錢大昕曰班里赤疑卽高昌王亦都護也名巴爾朮音相近東方

諸大將耶速不花等復會於幹難河行在共推帝卽皇帝位追尊皇考拖雷曰英武皇帝廟號睿宗命皇弟忽必烈

總治蒙古漢地民戶事開府金蓮川趙璧等撫慰軍民以芒哥撒爾爲總斷事官以孛魯合爲大必閣赤掌宣發號

令內外傳奏事以晃兀爾雷守和林宮闕帑藏阿藍荅副之以牙刺瓦赤等充燕京等處行尚書省事賽典赤尼札

馬丁佐之以塔納海麻速忽等充別什巴里等處行省事阿合馬耶的沙等佐之以阿爾渾充慈嶺西阿木河等處

行省事阿木河一作阿母河卽大唐西域記之縛芻河水入鹹海法合魯丁尼只馬丁佐之以察罕葉爾干統兩淮等處蒙漢軍以帶荅爾統四

元史卷四 本紀

二

川等處蒙漢軍以和里台統吐蕃等處蒙漢軍皆仍前征進誅諸臣持兩端誘昔烈門爲亂者數人遂頒便宜事於國中盡收諸王濫發牌印詔旨宣令諸王馳驛不得過三四馬不得擅招民戶諸王官屬不得借朝覲私斂民財罷築和林城役千五百人盡革近年竄政號令一新中外大

說

二年壬子宋理宗淳祐十二年也春正月皇太后怙烈氏崩夏帝駐和林以太宗諸子孫不得立多後言乃分遷諸王於各所太宗第六子合丹於別什巴里地卽今烏魯木齊太宗

第七子蔑里於葉爾的石河河卽太祖紀耶爾的石太宗諸

孫海都於海押立地海都太宗長子合失之子別爾哥於

曲爾只地未詳脫脫於葉密立地太宗第五子哈刺察爾之子葉密立卽今伊犁一作

阿力蒙哥都太宗第三子及太宗第六皇后乃馬真氏於

闊端所居地之西舊史作皇后乞里吉忽帖尼今從陳樞

在甘肅永昌舊誤作擴端仍以太宗諸后妃家貲分賜親王定宗后及

昔烈門母以厭禳事覺竝賜死謫昔烈門於墨脫赤之地

禁錮其黨於軍營秋七月詔以中州地封同姓命皇弟忽

必烈征大理宗王圖華薩兀征西域印度國宗王徹的不

華征西域沒里奚國宗王旭烈征西域素丹諸國旭烈一

兀即一人也列傳誤作二人宗王耶古征高麗國詔諭宋荆襄樊均諸

守將使來附八月祭天於和林北之日月山王禘日月山

一在漠北和林國語名阿刺温山一在漠南西路昌州寶山縣北見金史地理志用冕旒及登歌

樂帝獵於月帖古忽蘭之地墮馬傷臂不視朝百餘日十

二月合祭昊天后土始大合樂作神牌以太祖睿宗配禮志

元史卷四本紀

三

作八月十二日通鑑紀事本末作十二月按前書八月八日祭天甫四日又合祭天地無此數竝之理志文十二日

蓋十二大赦天下選諸色目人掌帑藏掌行帳掌祭卜巫

醫掌驛傳掌必闡赤繕發宣詔等官徙諸匠五百戶修行

宮以西域僧那摩為國師掌天下釋教以道士李真常掌

道教李真常即正處機之弟子是歲籍漢地民戶印度遣使入貢

三年癸丑宋理宗寶祐元年也春正月帝獵於徹蹇察罕

之地會諸王於幹難河北大頒賜子諸王耶苦即耶古以怨

冀諸王塔刺爾之營遂罷耶苦征高麗兵以札刺台代行

遣必闡別爾哥括幹羅思戶口三月敗宋兵於海州獲其

都統夏六月命郭侃等從宗王旭烈征西域哈里發巴哈

塔等國又命塔爾台圖魯華等征印度及怯失彌爾國西

方王拔都遣使乞買珠銀萬錠以千錠授之詔曰太祖太

宗之財豈能給諸王如此耗用此銀就充後歲賜數秋幸
軍海子凡海子舊史皆作腦兒蓋塞外呼海子爲淖爾也九月皇弟忽必烈征大

理次特刺地分兵三道進執其王段智興以歸大理平雷
兀良合台攻諸蠻未服者而自還軍四川忽必烈命四川
總帥汪德臣城利州屯田以備蜀命宗王耶虎與洪福源
征高麗拔禾山東州春州三角山楊根天龍等城

四年甲寅宋理宗寶祐二年也春帝獵於徹蹇察罕夏幸
月爾蔑怯之地秋七月詔官吏之赴朝會計錢糧者許自
首不公仍禁以後浮費冬大獵於耶滅千哈里察海之地
忽必烈還自大理遂自四川入覲於行在是歲會諸王於
顯顯海子之西仍祭天於和林北之日月山初籍新軍命
大臣舉將才擢史樞征行萬戶駐軍唐鄧張柔移鎮亳州

元史卷四 本紀

四

權萬戶史權屯鄧州忽必烈置經略司於汴分兵屯田西
起唐鄧東連清口桃源列障守之宋統制甘閏城紫金山
汪德臣襲據其地張柔奏築甬路自亳抵汴堤百二十里
以通兩淮軍餉宋均州總管孫嗣以蠟書降且乞援史權
以精甲據險要援之自是宋驍將各帥所部先後來降
五年乙卯宋理宗寶祐三年也夏帝幸月爾蔑怯之地秋
九月兀良合台自吐蕃進攻烏蠻白蠻鬼蠻盡降之得五
城八府四郡蠻部三十有七張柔會大帥於符離復築臨
淮甬道自亳南六十里以通陳蔡潁息舟餉札刺台與洪
福源征高麗拔其光州安城中州玄鳳珍原甲向玉果等
城

六年丙辰宋理宗寶祐四年也帝會諸王百官於裕爾陌

哥都之地設宴六十餘日賜金帛有差仍定擬諸王歲賜錢穀續發漢軍從忽必烈南征夏四月駐蹕塔密爾河五月幸昔刺帳殿六月太白晝見秋七月遣使問諸王駙馬軍過山東掠民羊豕之罪由是諸軍所過無犯是歲高麗國王雲南酋長及素丹諸國來覲兀良合台既討平諸蠻遂自馬湖江通道於嘉定重慶遣使以雲南平獻捷於朝命依漢故事分西南夷爲郡縣授劉時中爲宣撫司與段氏共安輯之進圖交趾賜雲南軍士采帛萬二千匹始建城市宮室於桓州東灤水北之龍岡是爲上都即開平府也是冬以西域阿木河回降民分賜諸王百官

七年丁巳宋理宗寶祐五年也春詔諸王出師征宋夏六月謁太祖行宮祭旗鼓復會於客魯連河秋駐蹕於軍海

元史卷四 本紀

五

子灑馬乳祭天九月帝以宋人背盟自將南征以駙馬刺真之子乞解鎮守阿羅思回鶻獻水晶瓶珍珠繖等物直銀三萬餘錠帝卻之且禁後毋復獻宗王塔察爾率諸軍南征圍樊城霖雨連月乃還元帥布鄰吉台軍自鄧州略地遂渡漢江是歲兀良合台自大理入覲遂經六盤山至臨洮府與大營合月餘復命西征自四川赴雲南秋九月兀良合台率段智興伐交趾十一月入其國安南王陳日昷竄海島遂班師遣阿藍荅及囊加台等行省事於陝西等處置鉤攷局會計錢穀旣而罷之冬帝渡漠南皇弟忽必烈及諸王公主等來迎大宴於玉龍棧遣歸

八年戊午宋理宗寶祐六年也春正月受朝賀於耶里本多哈之地二月陳日昷傳國於長子光昷遣使來貢方物

詔兀良合台引交廣兵北還會攻鄂皇弟旭烈率大將郭侃討平回鶻乞石彌爾及報達哈里發諸國禽其王來獻捷又渡海收富浪國轉戰萬里詔以旭烈畱鎮西域帝自將伐宋至東勝適河冰合覆以土遂濟四月駐蹕六盤山議由蜀攻其上游先命張柔從忽必烈攻鄂州命塔察爾攻荆山以分宋兵力是時御營軍四萬號十萬分三道進帝由隴州入散關諸王莫哥由洋州擣巴州之米倉關在小巴山絕頂今移於大巴山之麓李里察萬戶由漁關入沔州以明安荅爲太傅守關中畱兵守六盤山行宮五月皇子阿速台獵傷民稼帝讓之撻其近侍數人諭士卒拔民一草者斬以徇所至秋毫無犯秋七月以輜重畱六盤山率兵由寶雞進棧道九月駐蹕漢中冬十月帝次利州渡嘉陵江至白

元史卷四 本紀

六

水江造浮梁以濟初宋余玠帥蜀相度形勢徙利州治於金堂縣之雲頂山築苦竹隘於小劔山以備外水又徙合州城於釣魚山徙閬州治於蒼溪縣之大獲山徙順慶府治於青居山徙蓬州治於雲山徙渠州治於禮義山徙巴州治於平梁山又於昭化縣之長寧山劔州之鵝項嶺皆築堡戍守以備內水棋布星羅積粟繕兵守禦甚固我師所至購土人鄉道招降抵劔門攻小劔山之苦竹隘久不克會宋裨將趙仲引師入陷焉苦竹隘在小劔山絕頂四面斷崖前臨巨壑孤門控據一夫可守都元帥紐璘攻圍雲頂山降其守將雲頂在成都府金堂縣南五十里本名石城山余玠始築城於是外水失險時大軍志在由東川內水直出大江故不趨成都乃以紐璘守成都畱精兵五百守小劔遣使招諭龍州十一月帝自劔門南進遣兵圍昭

化縣之長寧山堡山在縣西南九十里下險帝督軍先攻

劔州之鵝項堡今劔州南二十里有鵝項嶺頂舊誤作頂力戰竟日破其城宋

守將王佐徐昕等皆戰死進攻閬州之大獲山降其城山頂有石城周十里余玠築此城是月龍州降十二月都元帥

為閬州治與蒼溪縣犄角

紐璘攻簡州帝次於運山遣人招降其守將師至順慶府

之青居山下其城山在順慶府南充縣南三十五里山高聳而頂平瞰嘉陵江余玠徙府治於此

州破之詔諸軍毋得掠諸王軍分路略地至江而還並會

於行在而四川都元帥紐璘亦畱兵守成都自將數萬人

舟數百艘渡馬湖江攻重慶溯流與大軍會惟合州守將

王堅固守釣魚山不下屢招拒命是歲李璣攻宋海州漣

水軍拔四城殺宋軍幾盡是冬詔兀良合台雲南軍以明

元史卷四 本紀

七

年會長沙與皇弟忽必烈南北夾攻宋

九年己未宋理宗開慶元年也春正月駐蹕重貴山北置

酒大會諸王大將問曰今在宋境軍曰南行夏暑且至北

軍其可久畱乎大將脫歡請大軍暫北還巴里赤願畱攻

帝遂畱屯於蜀諸王莫哥復攻渠州禮義山山在渠縣東六十里西距

渠山十里上有城趾宋寶祐中嘗徙渠州治其上以拒蒙古

耶律圖魯雄攻巴州平梁

山池水四時不竭宋時築城戍守兀良合台師還自交

趾由內地象州入靜江府連破湖南辰沅遂圍潭州會皇

弟忽必烈軍於鄂二月帝悉諸軍渡嘉陵江會戰合州城

下城據釣魚山涪江嘉陵江環其東南西三面峭壁上有

天池周五百步粟支數年守禦甚固三月蒙古兵仰攻各

門不克夏四月丙子大雷雨凡二十日五月屢攻輒卻六

月汪德臣復選精兵夜登外城馬軍寨遲明遇雨梯折後軍不克進而止凡五閱月不克帝觸暑雨不豫秋七月雷精兵三千守合州餘悉遣攻重慶是月帝崩於合州壽五十有二在位九年諸王大臣奉梓宮北還葬起輦谷追諡桓肅皇帝廟號憲宗帝早親軍旅剛明沈斷威著中外卽位以後不樂燕飲不好侈靡雖后妃不許過制初太宗崩後曠紀無君黃裳御統政出多門阿柄幾於旁落至是凡有詔旨帝必親起草更易數四然後行之御臣下甚嚴嘗謂臣下獎諭太過卽志氣驕溢過咎隨之是害之也承開國師武臣力之後西平印度南并大理東取巴蜀所向無敵惟遵其國俗喜田獵信巫覡卜筮是其小蔽使太宗卽世早承大業則伐宋之役不俟末年而南北混一矣天未

元史卷四

本紀

八

旣宋暑雨老師景命不延故大勳重集於世祖皇帝宋將孟珙自會攻蔡州後卽經營襄陽浚城池積軍儲厲士馬嚴守備當大軍攻襄陽時孟珙方守江陵宋復詔珙收荆襄珙謂必得郢然後可通餽餉得荆門州然後可出奇兵指授方略所至克捷珙又奏襄陽爲東西根本今百戰而得之當加經理非甲兵十萬不足以分守又分兵入蔡州火其積聚又於鄧州順陽燒其船材擾其屯糧與四川余玠一守上游一守中路故蒙古諸軍久不得志帝因暑雨病殞西蜀而退不然東南事久不可問矣

論曰世之亡國未有如宋之自取者也金於元無啟釁之罪而元於金有必取之心和亦亡不和亦亡宋則僻處南服炎徼水鄉本非蒙古所覬覦其始假道滅金爲宋復仇

畫蔡爲界盟誓未寒不旋踵而有端平入洛之師自構兵
端及合州固守憲宗告終皇弟遠在鄂城內顧家難倉皇
北去和亦歸不和亦歸元人已無心於江左矣信使東來
前好可繼而卽有拘使抗命之行猶遲之又久而後渡江
宋負元元不負宋其罪浮於金人數倍矣烏乎北宋不能
取垂亡之遼以復燕而欲挑釁於方張之金以擴土南宋
不能蹙垂亡之金以取蔡而欲抗并吞之蒙古以恢汴自
古謀國之舛未有如宋人之甚者天方將啟元運混一區
宇有莫之爲而爲者乎攻金求和於元者六次一宣宗貞
祐二年請太祖解燕京之圍議昏公主而後班師三宣宗
貞祐三年遷汴復遣求和而太祖命盡獻河北去帝號爲
河南王金不從三宣宗興定五年遣烏古孫仲端逾葱嶺

元史卷四

本紀

九

求和稱太祖爲兄不允四宣宗元光元年復遣仲端詣回
紇國行在求和命盡割關西地爲河南王不果五哀宗正
大六年遣使弔太祖之喪竝歸贈太宗卻不受六哀宗天
興元年圍汴京遣其兄子曹王譙可入質而速不台仍不
肯退師此金之於元萬無可解免者也又攷宋殺元使五
次一太宗時遣朔不罕由漢中假道被殺二月里麻思由
淮東假道被拘三廉希賢至獨松關而張濡殺之四遣張
羽等復書至平江而亦被殺竝郝經被執而五其宋人遣
使與元通和者二一寧宗嘉定十四年遣苟夢玉通好於
太祖約共攻金二理宗紹定五年太宗遣王檝至宋約共
伐金宋遣鄒伸之報謝約成功後以河南歸宋烏乎當建
炎南渡之始舍宗李岳韓劉吳名相名將不用而惟稱臣

稱姪於不共戴天之女眞及理度垂盡之朝力拒講解通和而日生釁挑兵於毫無夙隙之蒙古國旣亡矣而又子元以奉天討罪之名果何爲哉果何爲哉

元史卷四

本紀

十

元史卷四終

世祖上

世祖皇帝諱忽必烈太祖之孫皇子拖雷第四子憲宗同母弟也以乙亥八月乙卯生及長仁明英睿思大有爲於天下歲辛亥憲宗卽位諸弟惟帝取長且賢故盡屬以軍國庶事南駐爪忽都之地卽金蓮川也於是徵姚樞於蘇門待以賓禮初太宗立軍儲所於新衛收山東河北丁糧後惟計直取銀帛帝請於憲宗築五倉於河上始令民入粟宋兵時侵南境帝請置經略司於汴以史天澤楊惟中趙璧爲使俾屯田唐鄧繕城以備宋兵壬子夏奉命征雲南癸丑受京兆分地遣將成興元諸州又奏割河東解州鹽池以供軍立從宐府於京兆屯田鳳翔募民受鹽入粟

元史卷五 本紀

一

轉漕嘉陵更立京兆宣撫司以廉希憲楊惟中爲使徵許衡爲京兆提學設交鈔提舉司印鈔以佐經用秋出師臨洮次忒刺分三道以進帝由中道至滿陀城過大渡河經行山谷二千餘里抵金沙江乘革囊以濟摩些蠻主迎降在大理北冬師至白蠻打郭寨攻拔之不戮一人進次三四百餘里甸白蠻送款軍薄大理城時大理主段智興微弱國事皆決於高祥祥率眾遁去帝命大將野古追斬之分兵取附都鄙闡烏爨等部進入吐蕃渠長唆火脫懼出降遂班師甲寅冬至自大理入覲憲宗受命駐桓撫間建城龍岡初憲宗分漢地封宗屬而雅愛帝欲重之權命於汴京關中自擇其一帝已得關中至是憲宗曰關中戶寡河南懷孟地狹民夥可取以自益於是盡有關中河南之地會有讒

帝深得中土心者憲宗疑之命阿藍荅行省事於京兆劉
太平佐之鉤致河南陝西諸路財賦置局關中大開告許
帝用姚樞計盡遣妃主歸朝自見憲宗於六盤山相持各
泣下竟不令有所白而止遂罷鉤致局而帝所置諸司亦
廢憲宗將分道伐宋命帝征鄂州戊午冬自龍岡啟行己
未秋次汝南戒諸將毋妄殺命楊惟中郝經宣撫江淮八
月入大勝關宋戍兵皆遁進次黃陂九月駐師江北宋相
賈似道統兵來援適親王莫哥遣使以憲宗凶問告且請
北歸繫人望帝曰吾奉命南征豈可無功遽還自登香鑪
山俯瞰大江江北曰武湖湖東爲陽邏堡其南岸卽澣黃
洲宋以大舟扼江渡軍容頗盛帝遣兵夜具舟遲明至江
岸風雨晦冥諸將皆謂未可渡帝不從令揚旗伐鼓進天

元史卷五

本紀

二

爲開霽與宋師接戰者三殺獲萬餘人逕達南岸屯兵圍
鄂州似道懼密遣宋京如師願割江北地納幣請和帝不
許攻益急俄聞先朝諸臣阿藍荅渾都海等謀立帝弟阿
里不哥輒乘傳調兵去龍岡僅百餘里會似道再遣京至
約歲奉銀絹各二十萬帝從郝經廉希憲議許之十一月
軍北還輟耕錄云世皇軍次黃河苦乏舟夜夢兒叟引至
一所指曰此可渡也帝以物標識之乃覺明日循
行河澗間忽有人進曰此間水淺可渡帝曰汝能先涉否
其人乃行大軍自後從之皆濟帝欲旌其功對曰富貴非
所願但得自在足矣遂與十二月帝駐燕京近郊縱新僉
五品印撥三百戶倉之

民兵人心大悅

中統元年庚申宋理宗景定元年也春三月戊辰朔日倉
車駕至龍岡新城親王合丹莫哥塔察爾等率東西二道
宗王來會與諸大臣皆勸進辛卯帝卽位促鑄寶篆一治

而成眾皆慶賀夏四月戊戌朔初定官制以王文統爲中書省平章政事張文謙爲左丞辛丑以卽位詔天下曰朕惟祖宗肇造區宇奄有四方武功迭興文治多缺五十年於茲矣蓋時有先後事有緩急天下大業非一聖一朝所能兼備也先皇卽位之初風飛雷厲將大有爲憂國愛民之心雖切於己尊賢使能之道未得其人方董夔門之師遽遭鼎湖之泣豈期遺恨竟弗克終肆子冲人渡江之後蓋將深入焉乃聞國中重以僉軍之擾黎庶驚駭若不能一朝居者子爲此懼驛騎馳歸目前之急雖紓境外之兵未戢乃會羣議以集良圖不意宗盟輒先推戴左右萬里名王巨臣不召而至者有之不謀而同者皆是咸謂國家大統不可久曠神人重寄不可暫虛求之今日太祖嫡孫

元史卷五 本紀

三

之中先皇母弟之列以賢以長止予一人雖在征伐之間每存仁愛之念博施濟眾實可爲天下主天道助順人謀與賢祖訓傳國大典於是乎在孰敢不從朕峻辭固讓至於再三祈懇益堅誓以死請於是俯徇輿情勉登大寶自惟寡昧屬時多艱若涉淵冰罔知攸濟爰當臨御之始宜新宏遠之規祖述變通正在今日務施實德不尙虛文於戲麻數攸歸欽應上天之命勳親斯託敢忘烈祖之徽誕告多方與民更始丁未以郝經爲國信使何源劉人傑副之使宋議和且徵前約丙辰置急遞鋪僉鋪兵一晝夜行四百里以速軍機乙丑徵諸道兵六千五百人入宿衛此在內設立禁軍之始立互市於潁州漣水軍禁私商不得越境犯者死阿里不哥僭號於和林五月戊辰朔建元中

統甲午以阿里不哥反赦天下詔頒新政一求直言一理冤滯一均賦役一撫軍士一止貢獻乙未熒惑入南斗雷五十餘日分漢地爲十路置宣撫司賽典赤李德輝燕京路宋子貞益都濟南路史天澤河南路楊果北京路張德輝平陽太原路劉肅眞定路姚樞東平路張文謙大名彰德路粘合南合西京路廉希憲京兆路皆宣撫使定戶籍科差例分全科及減半科納絲輪鈔有差凡儒人及軍站僧道等戶皆不與僉平陽京兆兩路兵七千人於延安守隘此在外設立鎮戍軍之始徵諸路兵三萬衛京師六月戊戌以李壇爲江淮大都督阿里不哥使劉太平霍魯懷入京兆謀爲變廉希憲至捕誅之并誅乞帶不花於東川明里火者於西川六盤守將渾都海起兵應阿里不哥反

元史卷五

本紀

四

秋七月癸酉以趙璧平章政事張啟元參知政事王鶚翰林學士承旨史天澤兼江淮諸翼軍馬經略使丁丑設祖宗神位於中書省遣官致祭用登歌樂初祭享之禮割牲奠馬湏以蒙古巫祝致辭至是乃一變帝自將討阿里不哥八月己酉立秦蜀行中書省以廉希憲爲右丞行省事敕軍士所過毋擅撻辱官吏九月壬午初置拱衛儀仗及祭器法服陝西行省丞相阿藍荅自和林起兵至西涼與渾都海軍合丙戌命諸王合丹哈必赤率師敗之於姑臧禽斬之西土平冬十月癸丑初行中統寶鈔自十文至一貫文凡十等不限年月諸路通行賦稅竝聽收受十一月戊子熒惑與填星順行太陰犯房發粟振益都濟南濱棣饑自是凡遇各路府州縣及諸王投下水旱荒饑輒發穀

鈔振糶十二月丙申帝至自和林乙巳以西僧八思巴爲帝師授玉印統釋教是歲立太常寺玉宸院儀鳳司符寶局御酒庫升龍岡新城爲開平府以吏戶禮爲左三部兵刑工爲右三部各設尙書二員

二年辛酉宋理宗景定二年也春正月辛未夜東北赤氣照人大如席庚寅李壇擅發兵修益都城塹二月丁酉太陰掩昴丙午車駕幸開平詔減民間差發及軍站重科租稅罷守隘軍三月壬戌朔日倉夏四月丙午聽儒士被俘者贖爲民乙卯命十路宣撫官勸農桑抑游惰禮高年問民疾苦舉茂才異等可從政者列名上聞其職官污濫及民不孝弟者量輕重議罰是月躬祀天於桓州之西北灑馬渾爲禮皇族之外無得與五月乙丑遣崔明道李全義

元史卷五

本紀

五

爲詳問官詣宋問國信使所在庚辰諭使臣經過官給餼廩軍士毋輒入民家丁亥弛諸路山澤禁私殺馬牛越境私販馬者罪死命史天澤爲中書右丞相河南軍民竝聽節制置惠民藥局以姚樞爲太子太師竇默爲太子太傅許衡爲太子太保皆辭不拜六月癸巳諭各路宣聖廟有司歲時致祭諸儒月朔釋奠諸官員使臣軍馬毋得宿廟及聚飲理訟其中書院亦如例違者加罪丙申罷諸路拘收字蘭奚括漏籍老幼等戶協濟編戶賦戊戌太陰犯角庚子定鹽酒稅法乙卯罷安邑貢蒲萄酒免衛輝懷孟賦稅償其所借芻粟庚申宋安撫劉整籍瀘州十五郡來降以整爲夔路安撫使升眞定鼓城縣爲晉州罷金銀銅鐵丹粉錫綠坑冶所役民夫及河南舞陽薑戶藤花戶還

州縣出工局繡女懷孟提舉王允中引沁水鑿渠成溉田四百六十餘所賜名廣濟渠命耶律鑄爲左丞相秋七月辛酉朔立軍儲都轉運司癸亥立翰林國史院敕修遼金二史以史天澤耶律鑄爲監修官采訪遺事命宋降將王青製神臂弓柱子弓教武衛軍習射諭河南管軍官於近城地量存牧場餘聽民耕乙丑遣官持香帛祀嶽瀆海鎮及后土凡十有九處分五道每歲代祀自此始辛巳詔許衡卽其家教懷孟生徒己丑命鍊師王道歸於眞定築道觀賜名玉華自後每忌日享睿宗帝后御容於玉華宮卽此發諸道兵伐宋詔曰朕卽位之後深以戢兵爲念遣使於宋以通和好宋人不務遠圖伺我小隙反啟邊釁東剽西掠曾無寧日朕今春還宮諸大臣皆以舉兵南伐爲請

元史卷五

本紀

六

朕重以兩國生靈之故猶待信使還歸庶有悛心共成和議畱而不至者今又半載矣往來之禮遽絕侵擾之暴不已曲直之分灼然可見卿等當整爾士卒礪爾戈矛矯爾弓矢秋高馬肥水陸分道而進大興問罪之師尙賴宗廟社稷之靈其克有勳毋替朕命八月壬辰賜故金補闕李大節諡眞肅修魏璠諡靖肅戊戌以賽典赤平章政事許衡爲國子祭酒姚樞爲大司農竇默仍翰林侍講學士庚子立勸農司以陳邃崔斌等爲使壬寅頒斗斛權衡丙午太白犯歲星宋私商七十五人入宿州有司議寘法帝宥之聽榷場賈易九月庚申朔奉遷祖宗神主於聖安寺藏之瑞像殿戊辰徵儒人楊庸爲教授教孔顏孟三氏子孫王庸爲太常少卿教習大樂辛未置和糶所於開平丙

子諭諸王駙馬凡民間詞訟無得私自斷決田租輸沿河近倉官爲轉漕毋勞民癸未改開元路隸北京免眞定官民所貸官錢立諸路提舉學校官以王萬慶敬鉉等三十人充之冬十月庚寅朔帝自將討阿里不哥諸王合丹塔察爾從命平章趙璧尙書怯烈門各率蒙古漢軍駐燕京近郊大行一帶東至平灤西控關陝立堡寨壬寅命亳州張柔歸德邸浹睢州王文翰水軍解誠張榮實東平嚴忠嗣濟南張宏七萬戶及指揮使鄭江董文炳各率所部兵詣行在十一月壬戌與阿里不哥遇於昔木土海子諸王合丹塔察爾分兵奮擊大破之逐北五十里帝親率師躡其後阿里不哥北遁庚午太陰犯昴癸酉命怯烈門趙璧率諸軍從塔察爾北上分蒙古軍一出居庸關駐宣德

元史卷五

本紀

七

德興府一出古北口駐興州帝親將諸萬戶漢軍及武衛軍由檀順州駐潮河川以防之罷十路宣撫司止畱開元路十二月辛卯熒惑犯房壬辰犯鈞鈐甲午帝還師詔徹所在戍兵放民間新僉軍壬寅立異樣局達魯花赤掌御用織造立宮殿府專職營繕及御衣宮闈尙倉尙藥諸局設控鶴軍五百四人以軍使領之是歲天下戶百有四十一萬八千四百九十

三年壬戌宋理宗景定二年也春正月辛未禁諸道戍兵及勢家縱畜牧犯桑棗禾稼癸酉以軍興人民勞苦停公私逋負毋徵丙戌命備宮懸鐘磬樂舞籥翟用樂工三百六十二人二月丁亥朔定中外官俸己亥李壇反以漣海三城獻於宋遂入益都丙申郭守敬造寶山漏成徙至燕

京甲辰詔發兵討李璿一會東平一會濱棣以諸王哈必赤總軍事己酉王文統坐與李璿通謀伏誅詔諭天下壬子李璿據濟南三月己未括木速蠻畏吾兒耶里可溫達失蠻等戶丁爲兵徙弘州錦工繡女於京師壬申命戶部尙書劉肅專理鈔法免北京西京絲銀稅夏四月丙戌朔大軍圍濟南辛卯修河中禹廟賜名建極宮甲辰太白晝見敕諸路管民官勸民開墾種植不得擅興不急之役妨奪農時乙卯詔軍民爲李璿脅從者宥其罪命右丞相史天澤專征五月庚申築環城圍濟南禁軍行所在剽掠蠲濱棣今歲田租之半東平十之三戊辰命大司農姚樞與尙書劉肅共商議中書省事六月乙酉朔割遼河以東隸開元路徙婆娑府屯田軍於鴨綠江西以防海壬寅陝西

元史卷五

本紀

八

行省言西京宣德大原匠軍困乏乞僉民往代帝曰軍籍已定豈宜更張可令貧富相資果甚貧者聽休息一歲秋七月戊午復蒙古軍站戶差賦農民包銀徵其半停戶止令輸絲民當供賦之月無徵私債甲戌李璿就禽磔於市甲申夜有白氣亙天八月己丑郭守敬請開玉泉水以通漕運王允中請開邢洺二州漳滏澧河達泉以溉民田並從之甲午以宣德州德興府銀冶付匠戶歲取銀及石綠丹粉輸官丙午立諸路醫學教授九月戊午以董文炳兼山東路經略使收集蓋都舊軍充武衛軍戌南邊壬戌改邢州爲順德府癸酉命阿朮爲征南都元帥治兵於汴閏月甲申朔免諸路軍戶他徭發粟三十萬振濟南冬十月丙寅分東西兩川都元帥府爲二賜高麗國王麻自是每

歲皆賜庚午敕總帥汪惟正將戍青居軍還屯田利州乙亥分立中書左右部以回紇人阿合馬領之仍兼諸路都轉運使專理財賦丁丑禁畿內田獵諭質子軍入侍十一月乙酉太白犯鉤鈴辛丑日有背氣重暈三珥作佛頂金輪會於聖安寺金錄周天醮於長春宮自是每歲間作遷河西民居應州官給牛種仍賜布人各二匹乙巳史天澤入見帝曰朕自知性不容物或乘怒欲有誅殺卿宜遲留俟覆奏方行戊申升撫州爲隆興府建行宮十二月甲寅封皇子眞金爲燕王守中書合丙辰立河南山東兩路統軍司自亳州至鈞州諸萬戶隸河南宿州至寧海州諸萬戶隸山東丁巳立十路宣慰司以總軍民立諸路轉運司掌權稅癸亥詔各路總管兼萬戶者止理民事勿預軍政

元史卷五

本紀

九

其州縣官兼千百戶者仍其舊諸路管民總管子弟有分管州府司縣及鷹房人匠諸務者悉罷之戊寅升大原臨泉縣爲臨州是月卽中書省奉祀祖宗神位備三獻官大禮使司徒攝祀事禮畢神主復藏瑞像殿

四年癸亥宋理宗景定四年也春正月丙戌改諸路監權課稅所及清滄深鹽提領所爲轉運司甲午立十路奧魯總管府癸卯從阿合馬請興河南鐵冶設巡禁私鹽軍以廉希憲爲中書平章政事姚樞爲左丞商挺參知政事乙巳諭諸路漢軍奧魯毋隸各萬戶管領其科徵差稅山東河南隸統軍司東西兩川隸征東元帥府陝西隸行戶部辛亥放濟南所俘民文面爲奴者歸元籍二月壬子朔詔諸路官員子弟入質軍駕幸開平發各衛軍千五百人扈

從諸衛漢軍萬五千人駐山後蒙古軍三千人駐官山防守歲如制甲子以王德素充國信使致書於宋詰其稽留郝經之故括民間兵器匿者死三月己亥定諸路包銀準輸鈔其絲料入本色非產絲之地亦聽折鈔癸卯初作太廟於燕京夏四月以太祖所行事蹟付史館五月乙酉初立樞密院以皇子燕王兼判院事戊子升開平爲上都辛卯立平準庫以均物價通鈔法庚子升開平望雲縣爲雲州松山縣爲松州從阿合馬請以歲入鐵鑄農具令民易粟輸官六月癸酉建帝堯廟於平陽給洒掃戶田五十頃命線眞爲右丞相塔察爾爲左丞相秋七月癸未禁諸投下毋擅勾攝燕京路州縣官吏諸路探馬赤毋擾民蒙古軍不得以民田爲牧地戊戌弛沿邊軍器禁置榷場於樊

元史卷五

本紀

十

城與宋通互市八月戊申朔置元帥府於大理升宣德州爲府隸上都以淄萊登三州爲總管府治淄川命昔撒昔總制鬼國大理兩路兵部郎中劉芳使大理至吐蕃遇害詔恤其家戊午以阿脫商挺行樞密院於成都順慶潼川元帥府竝聽節制甲子以西涼經兵振之鈔仍免租賦三年諭諸臣傳旨有疑者許覆奏壬申車駕至上都九月乙酉立漕運河渠司禁民間所市布帛疏薄狹短者冬十二月丁未朔令益都元帥欽察統鳳翔青居平陽軍戍虎嘯寨甲戌徵耶里可溫達失蠻僧道等戶田租商稅是歲天下戶百有五十七萬九千一百定民間絕戶財產竝拘入官毋寡子幼其母不得私鬻田宅放賤爲良富家子弟父兄在者不得私借錢債典售家產人口違者斷追入官

至元元年宋理宗景定五年也春正月丁丑朔高麗國王
王禴遣使來賀自是每正旦皆至敕諸路宣慰使非奉詔
無輒入覲諸王位下工匠已籍爲民者竝徵差賦癸卯築
冷水河城分兵戍之二月辛亥選儒士編修國史譯經書
起館舍給俸贍之壬子修瓊華島疏雙塔漕渠丁卯太陰
犯南斗癸酉車駕幸上都以西北諸王款附召諸路總管
赴上都大朝會夏四月戊申以彰德洛磁路引漳滏洹水
灌田致御河淺澀鹽運不通命塞分渠以復水勢辛亥太
陰犯軒轅御女戊午太白晝見五月乙亥遣郭守敬行視
西夏河渠庚辰敕劍州守將分軍守劍門關立寨人頭山
釋宋私商五十七人給糧遣歸丙戌太陰犯房己亥犯昴
以粘合南合平章政事秋七月甲戌彗星出鬼柳昏見西

元史卷五

本紀

十一

北光燭天長數十丈貫上台掃紫微文昌北斗旦見東北
凡四十餘日癸未改新鳳州爲徽州以西番十八族部立
安西州丁酉龍門禹廟成庚子阿里不哥與親王玉龍蒼
失阿速帶昔里吉等及其謀臣不魯花阿里察脫忽思自
歸上都帝曰諸王皆太祖之裔釋不問惟誅不魯花等三
人八月壬寅朔乙巳立諸路行中書省以省官出領其事
軍國重務無不統攝詔頒新立條格定官吏員數分品從
等秩給俸祿授公田計日月以攷殿取禁擅用官物勿以
官物進獻勿借易官錢勿擅科差役凡軍馬不得停泊邨
坊詞訟不得隔越陳訴恤孤寡勸農桑驗旱澇平市價具
盜賊囚徒起數月申省部其諸王使臣驛傳稅賦差發不
得擅招民戶不得以銀與非投下人爲幹脫禁口傳敕旨

及追呼省臣官屬庚戌定諸站戶限田四頃免稅以供驛馬及祇應癸丑以劉秉忠拜太保參領中書省事始定都於燕改燕京爲中都分立省部其大興府仍舊丁巳改元大赦詔曰應天者惟以至誠拯民者惟以實惠朕以菲德獲承慶基內難未戢外兵未戢夫豈一日於今五年賴天地之畀矜暨祖宗之垂裕凡我同氣會於上都雖此日之小康敢朕心之少肆比者星芒示儆雨澤愆常皆闕政之所由顧斯民其何罪宣布維新之令溥施在宥之仁可大赦天下改中統五年爲至元元年戊午彗星伏甲子復見於參車駕至自上都自是二月臨幸八月始還元世諸帝率循無異皆不書冬十月庚戌有事於太廟奉安祖宗神主戊辰改武衛軍爲侍衛親軍分左右翼宋主昀殂太子

元史卷五

本紀

三

禛嗣改元咸淳十一月辛巳吉里迷國內附言東有骨鬼亦里于兩部歲來侵疆詔發兵征骨鬼壬辰罷領中書左右部并入中書省仍以阿合馬平章政事兼諸路都轉運使知大府監事十二月乙巳定中外官儀從甲子太陰犯房詔宋人新附及北人陷沒來歸者皆月給衣糧庚午罷各路奧魯官竝各投下達魯花赤始立州郡長吏遷轉法五品以上宣授六品以下敕授是歲招集析居放良還俗僧道編集人戶名怯憐口習諸色匠藝設總管府領之

二年乙丑宋度宗咸淳元年也春正月辛未朔日食癸酉徙鎮海百里入謙謙州諸色匠戶於中都給銀萬五千兩爲行費又徙奴懷忒木帶爾礮手人匠赴中都造船運糧乙酉籍河南北荒田分給蒙古軍耕種庚寅城西番匣答

路癸巳八東乞爾部牙西來朝貢銀鼠皮二月辛丑朔并
六部爲四以麥朮丁爲吏禮部尙書馬亨戶部尙書嚴忠
範兵刑部尙書別魯丁工部尙書禁山東諸路私煎硝鹵
甲子定蒙古人充各路達魯花赤漢人充總管回鶻人充
同知永如制凡文案一同判行印信聽達魯花赤封識長
官收掌廉希憲商挺罷以寶合丁王晉代之諭僧人通五
大部經者爲中選以有德業者爲州郡僧錄判正副都綱
等官仍於各路設三學講三禪會二月乙未罷南北互市
括民間南貨官給其直骨鬼襲擊吉里迷部兵帝命出粟
及弓甲給之免權上都商稅酒醋諸課夏閏五月癸卯升
禧縣爲景州罷淘金總管府聽民采辦丁卯定四親王南
京分地鄭州隸合丹鈞州隸明里睢州隸字羅赤蔡州隸

元史卷五

本紀

三

海都其他屬邑皆還朝廷命趙璧行省南京廉希憲行省
東平姚樞行省西京詔各路州府戶不滿千者量加并省
凡投下者各附所隸州城其散府州郡戶少者不更設錄
事司及司候司附郭縣止聽州府官兼領自是裁并州縣
凡二百二十餘所六月戊辰朔新得州土官向良內附令
移戍通江徙山東統軍司於沂州丙子太陰犯心大星秋
八月己卯諸省臣皆罷命安童爲右丞相伯顏爲左丞相
阿朮帥師攻廬州安慶諸路宋將范勝張林高興孟興戰
死九月戊戌將有事於太廟命滌養犧牲取大樂工於東
平預習儀禮癸子皇孫鐵穆耳生冬十月己卯享太廟尊
皇祖爲太祖追諡聖武皇帝皇祖妣爲光獻皇后癸未敕
統軍萬戶麾下所俘人口官贖爲民其私越禁界被獲者

許親屬完聚詔貧難軍或兩戶三戶合出正軍一名其丁單有力者許募人應役十二月庚午改北京西夏二行省爲宣慰司己丑瀆山大玉海成置廣寒殿改諡皇考睿宗爲景襄皇帝上皇妣尊諡爲莊聖皇后升祔睿宗廟置宗王府札魯忽赤十員掌諸王駙馬投下蒙古色目人應犯一切公事及漢人姦盜等罪

三年丙寅宋度宗咸淳二年也春正月壬子立制國用司以阿合馬爲使張惠副之張易同知司事二月丙寅以廉希憲宋子貞平章政事張文謙爲左丞阿里爲右丞史天澤爲樞密副使甲申製太常禮樂工冠服復立東京廣寧懿州開元恤品合懶婆娑等路宣撫司參知政事王晉侍中和哲斯轉運使王明坐隱匿鹽課伏誅夏四月丁卯五

元史卷五

本紀

十四

山珍御榻成置瓊華島廣寒殿庚午定歲祀嶽鎮海瀆之制五月丙午浚西夏中興漢延唐來等渠丙辰罷蓋都行省及息州安撫司六月丁卯封皇子南木合爲北平王戊寅申嚴陝西河南竹禁秋七月丙申以張德輝參議中書省事己未發西夏避亂民還本籍成都新民爲豪家所庇者勒歸州縣十一月辛卯詔給京府州司縣官吏俸及職田命忽都荅爾爲中書左丞相丙辰諭四川行院江漢庸蜀等效順其官吏對階改授有功者遷有才者用民無生業者振衣糧願遷內地者給田廬毋令失所十二月辛酉改四川行院爲中書省立諸路洞冶所聽制國用司節制丁亥建大安閣於上都鑿金口導盧溝水轉漕西山木石命張柔段天祐同行工部事築宮城立提點宮城所

四年丁卯宋度宗咸淳三年也春正月癸卯修曲阜宣聖廟乙巳百濟遣使來朝禁僧官侵理民訟辛亥以趙璧爲樞密副使許衡謝病還懷孟癸丑封昔木土山爲武定山其神曰武定公泉爲靈淵其神曰靈淵侯以駕討阿里不哥駐此之故僉蒙古軍戶二三丁者一人四五丁者二人

六七丁者三人爲軍戊午析上都隆興府自爲一路三月

己丑耶律鑄復爲左丞相

是年置丞相五員

辛卯自潼關至蘄縣

立河渡官八員譏察姦僞乙未建習樂堂於中都使樂工肄業壬寅從安童言止設丞相二員蒙古漢人參用外用老成一二員同議省事丁巳耶律鑄置宮縣樂成賜名大

成樂夏四月甲子新築宮城於中都東北方六十里爲門

十二

初金人滅宋移汴京良嶽石於燕京壘成萬壽山元築宮城山適在大內西北太液池之陽名曰瓊華島

元史卷五

本紀

五

五月丁亥朔日倉新建孔子廟於上都丙申威州山後大番弄麻等十一族來附壬子增諸路包銀一兩充官俸六月乙丑史天澤復爲左丞相忽都荅爾耶律鑄竝降平章政事伯顏降右丞廉希憲降左丞阿里張文謙竝降參知政事詔亦卽納新附貧民從人借貸者官爲代償秋八月庚申瑱星犯天罈丙寅以宣徽院掌供玉食宴享及孳畜芻菽等事用人得自選不由中書壬午太白犯軒轅大星九月壬辰作玉殿於廣寒殿中乙未敕汪良臣立寨於母章德山控扼江南以當鈞魚山之衝戊申復召許衡爲祭酒庚戌封皇子忽哥赤爲雲南王往鎮大理帝曰朕固樂其風土曩非麻數在躬當於彼分器焉乃析其國三十六部爲三路冬十月壬戌魚通岳州番部入附以渠長阿奴

版的哥爲喝吾等處總管改給鐵旗城後番官璽書符命
甲子歲星犯軒轅大星庚辰定官員廕敘格十一月乙酉
享太廟宮縣登歌樂文武二舞咸備戊戌立新蔡益津二
縣甲辰立夔府路總帥府戌開州乙巳填星犯天鐔距星
十二月己卯省平陽路岳陽和川二縣入冀氏安西路櫟
陽縣入臨潼立諸位幹脫總管府

五年戊辰宋度宗咸淳四年也春正月甲午太陰犯井閏
月戊午令益都漏籍戶四千淘金棲霞縣每戶歲輸金四
錢二月戊子太陰犯天關己丑犯井三月丙寅免諸路四
品以下官子孫入質壬申改母章德山爲定遠城武羣山
爲武勝軍丁丑罷諸路女眞契丹漢人爲達魯花赤者夏
五月辛亥朔以太醫院拱衛司教坊司及尙倉尙果尙醞

元史卷五

本紀

七

三局隸宣徽院秋七月癸丑初立御史臺命右丞相塔察
爾爲御史大夫帖只爲御史中丞帝曰臺官職在直言朕
或有未當其極言無隱毋憚他人朕當爾主戊辰罷諸路
打捕鷹房工匠洞冶總管府竝聽轉運司兼領遣忙古帶
率兵征建都蠻九月癸丑罷中都路和雇所立京師瀕河
十倉丁巳阿朮統兵圍樊城冬十月戊寅朔日食己卯敕
中書省樞密院凡事與御史臺同奏初設起居注以翰林
官兼充十二月戊寅敕二分二至及聖誕節祭星於司天
臺復置乾州奉天縣以好時永壽二縣省入是歲帝擊叛
王海都於北庭追至阿力麻里之地去上都萬餘里海都
遠遁帝令勿追

六年己巳宋度宗咸淳五年也春正月癸丑立四道提刑

按察使司設副使僉事巡行各道曰山東東西道河東陝西道山北東西道河北河南道任滿聽御史臺致核戊午命史天澤董師襄陽二月己丑頒蒙古新字詔曰國家肇基朔方制用文字皆取漢楷及畏吾字以達本朝之言攷諸遼金及遐方諸國例各有字今文字寢興字書方缺特命國師八思巴冊蒙古新字頒行諸路譯寫一切文書期於順言達意而止凡璽書頒降俱用新字仍各以其國字副之丁酉救宮燭毋彩繪鞍韉箭鏃不得以黃金爲飾夏四月辛巳製玉璽大小十紐放單丁貧乏爲民禁戍卒毋踐屯田禾稼以眞定等路蝗免代輸築城夫戶賦癸卯命董文炳率兵南征秋七月辛酉製太常寺祭服己巳立諸路蒙古字學設教授命職官子弟每路二人府州各一人

元史卷五

本紀

七

民間子弟上路三十人下路二十五人充生徒凡省院臺部竝用識蒙古字人員作必閣赤譯寫文移立西蜀四川監榷茶場司八月己卯立金州招討司丙申命中書省采輯農桑事定列條目令按察使與州縣官相風土所宜頒行九月詔諭淮蜀官民曰朕纂承丕基同仁一視罔間南北兩淮四川大江以南皆吾赤子卽位之始未遑他務首遣國信使副講信修睦以通和好惟期投戈卷甲使兩地百姓息肩咸遂安生樂業之願豈意宋人妄生邊釁是驅若國生靈置之鋒鏑而不恤也恐有無辜枉被殘擾今詔諭彼界官吏軍民人等及我國人或因小過逋亡或勢不獲已因而陷沒者當明知朕不欲用兵之本意爾等卽轉禍爲福其審圖之戊午定民間貸錢雖踰限止償一本息

冬十月己卯定朝儀服色壬午升高唐冠氏竝爲州庚子太陰犯辰星遣官慮囚救諸路繆廢疾官給廬舍薪米後皆不書十二月戊子築東安渾河堤己丑時享畢命國師作佛事於太廟七晝夜造木質金表牌位十六設大榻金椅奉安祆室前此太廟薦佛事之始析彰德懷孟衛輝爲三路升林慮縣爲林州改禎州爲韓城縣并省馮翊等州縣十所始置義倉

七年庚午宋度宗咸淳六年也春正月丙午耶律鑄廉希憲罷立尙書省罷制國用使司以忽都荅爾爲中書左丞相許衡爲左丞阿合馬平章尙書省事張易副之張惠李堯咨麥朮丁竝參知尙書省事己酉太陰犯畢救諸投下官隸中書省

初制以中書省統山東西河北地大都燕京皆隸焉謂之都省至是以諸王駙馬投下官

元史卷五

本紀

大

并隸之

二月辛未朔以伯顏爲樞密副使甲戌築昭應宮於高粱河丙子帝御行宮觀劉秉忠許衡及太常卿徐世隆所起朝儀大悅舉酒賜之丁丑以歲饑罷築宮城壬辰立司農司以張文謙爲卿設四道巡行勸農官三月庚子朔日倉改諸路行中書省爲行尙書省丙辰浚武清縣御河夏四月壬午檀州隕黑霜二夕五月甲辰威州汝鳳川番族渠長來朝以合荅平章政事丙辰免上都商稅惟市易莊宅奴婢孳畜例收契費六月庚辰敕成軍還沿途立安樂堂饑者食之病者醫之死者槩葬官給其直丙申立籍田於中都東南郊秋七月辛丑設上林署乙丑以遼東開元總管府兼本路轉運司事八月戊辰朔阿朮築環城以逼襄陽戊寅以塔察爾同知樞密院事帖只爲御史大夫

辛巳置應昌府設官屬九月庚子汰僧道耶里可溫有家室者爲民丁巳太陰犯井丙寅括河西戶口定田稅冬十月庚午太白犯右執法癸酉定宗廟祝文書以蒙古字牲牢用野豕時果勿市取之內園降興中府爲州十一月壬寅熒惑犯太微西垣上將立侍儀司掌朝會諸儀史天澤築萬山爲一字城自是襄樊道絕閏月丁卯朔禁繒段織日月龍虎及以龍犀飾馬鞍者壬辰立諸站都統領司總驛傳仍設脫脫禾孫盤詰往來奸僞十二月丙申朔改立大司農司增巡行勸農使副各四員命御史中丞孛羅兼大司農卿以都水監隸之定歲祀制每春秋二仲月上戊日祭大社大稷於西南郊立春後丑日祭風師於東北郊立夏後申日祭雨師雷師於西南郊壬寅降河南韶州爲

元史卷五 本紀

九

澠池縣丁未金齒驃國三部長內附獻馴象三辛酉建大護國仁王寺於高良河更定僧尼服色是歲東京路旱南京河南等路蝗免絲銀十之三振山東淄萊路饑者再八年辛未宋度宗咸淳七年也春正月丙寅太陰犯畢己卯諭南陽屯田人戶皆內地中產之民遠徙失業各仍還本籍南京諸郡民賦悉改輸米粟貯近地給襄陽軍遣兀都蠻帥師鎮西方旦當發近畿民三萬八千人築宮城二月乙未朔定官民婚聘禮數己亥罷諸路轉運司入總管府移陝蜀行省於興元癸卯以趙璧爲中書右丞乙巳大理宣慰寶合丁王傅闊闊帶毒殺雲南王忽哥赤事覺伏誅戊申以治事日程論中外官吏己未敕軍官佩金銀符其民官工匠所佩者並拘入勿復給辛酉分歸德爲散府

升申州爲南陽府濟州爲濟寧府三月乙丑增置河東山西道提刑按察司改河東陝西道爲陝西四川道山北東西道爲山北遼東道辛巳復立夏邑縣以碭山并入省穀熟縣入睢陽乙酉許衡以老病乞解機務除集賢大學士兼祭酒如故設蒙古國子學選蒙古漢人官員子孫及俊秀者充生徒好學者兼習算法丁亥熒惑犯太微西垣上將己丑敕有司毋滯獄以致越訴封皇子燕王乳母趙氏幽國夫人夫鞏德祿追封德育公夏四月戊午阿朮與宋將范文虎戰於湍灘敗之五月乙丑以東道兵方圍襄陽分命秦蜀諸將各進兵鄭鼎出嘉定汪良臣出重慶札刺不花出瀘州曲立吉思出汝州以牽制宋師所至順流縱棧獲宋戰艦甚眾丙寅牢魚國來貢己卯命史天澤平章

元史卷五 本紀

三

軍國重事六月甲午諭樞密院凡軍情徑奏不由尙書省有事關錢糧者仍與共議管民官所領錢穀竝俟年終攷較乙卯招集河西幹端昂吉阿等處居民秋七月壬戌朔設回回司天臺官屬丁卯命國王頭輦哥行省北京有訴運山侍郎張大悅與宋交通者帝諭之曰宋人善用間計朕不輕信毋懷疑懼辛未置左右中三衛親軍都指揮使司掌宿衛扈從兼屯田事八月壬辰朔日倉己未聖誕節始立內外仗及雲和署樂位東川統軍司攻拔銅欽寨宋總管李慶降以慶知梁山軍九月丙寅罷陝西五路西蜀四川行省以耶速荅爾行四川省事於興元京兆等路直隸尙書省戊辰升成都德陽縣爲德州降虢州爲虢略縣丙子太陰犯畢敕今歲享太廟毋用犧牛癸未弛四川茶

鹽禁帝曰四川民力困敝自今有言茶鹽之利者以違制論冬十一月辛酉朔建國號大元詔曰誕膺景命奄有四海必有美名以紹紀統唐之爲言蕩也虞之爲言樂也馴至禹興而湯造互名夏大以殷中世降以還事殊非古爲秦爲漢者止從初起之地名曰隋曰唐者僅乃始封之爵邑是皆徇百姓見聞之狃習要一時經制之權宜我太祖起朔土膺帝圖方輿之廣歷古所無旣成大業宜定鴻名取易乾元之義可建國號曰大元十二月辛卯朔宣徽院請以闕遺漏籍等戶淘金帝曰姑止毋重苦吾民也乙巳立新字學士於國史院掌翻譯文字省太常寺入翰林院宮殿府入少府監

九年壬申宋度宗咸淳八年也春正月甲子罷尙書省入

元史卷五

本紀

三

中書省以阿合馬張易竝平章政事張惠爲左丞李堯咨麥朮丁竝參知政事罷給事中中書舍人檢正等官仍設左右司丁丑命西平王奧魯赤領忙古帶十八族欲速公弄等吐蕃軍同征建都蠻降新安州爲縣隸順天改諸路行尙書省仍爲行中書省分立京兆行省壬午改山東東路統軍司爲行樞密院移鳳州屯田於鹽白二州二月辛卯詔札魯忽赤乃太祖開國所制位列百司上其賜銀印立左右司

自後多稱耶可札魯忽赤

改中都爲大都戊申始祭先農於東郊如祭社儀三月甲戌焚民間四教經免醫戶差徭阿朮破樊城外郭夏五月戊午朔立和林轉運司兼提舉交鈔癸亥遣拔都軍於怯鹿難之地開渠耕田罷西番圖魯干諸處金銀礦戶爲民乙酉太白犯畢距星建宮城東西

華左右掖門六月壬辰減乞里吉思屯田租宋師救襄陽
阿朮敗之龍尾洲宋統制張順張貴死之京師大雨壞牆
屋壓死者眾禁私鬻回回麻秋八月丙戌朔日倉戊子立
羣牧所掌天閑及尙方鞍勒九月丙寅括諸路正軍貼戶
及同籍親戚奴僕丁年既長依權要避役者竝還爲軍戊
寅太陰犯御女冬十月丙戌朔封皇子芒兀刺爲安西王
賜京兆分地駐兵六盤山遣使持詔諭扮卜忻都國戊戌
以趙璧平章政事張易爲樞密副使熒惑犯填星己亥定
每歲自七月至十一月終聽捕獵餘月有禁癸卯立會同
館以居降人及番洞官之來朝貢者百官志稱至元十二年始置今據紀文載
此十一月壬戌諸王只必帖木爾築新城成賜名永昌府
丁卯太陰犯畢己卯并中書省左右司爲一回回獻巨石

元史卷五本紀

三

礮命送襄陽軍前十二月乙酉朔宋將咎萬壽攻成都僉
省嚴忠範戰失利逮至京

十年癸酉宋度宗咸淳九年也春正月戊午立京師醫學
名廣惠司癸亥阿里海牙取樊城宋將張漢英范天順牛
富死之丁卯立祕書監掌歷代圖籍并陰陽禁書選世家
名臣子弟爲監丞己卯置軍器丞盈二庫分典弓矢甲冑
遣使持金十萬兩市藥師子國二月丙申雲南羅拜渠長
阿旭叛敕有司安集其民丁未宋安撫呂文煥以襄陽降
召赴闕其熟券軍畱襄陽屯田生券軍分隸各萬戶翼二
月丙寅帝御廣寒殿授皇后弘吉刺氏玉冊玉寶授皇太
子眞金玉冊金寶詔告天下壬申分金齒國爲兩路癸酉
客星青白如粉絮起畢度五車北復自文昌貫斗杓歷梗

河至左攝提凡二十一日命耶律鑄平章軍國重事張惠爲右丞夏四月癸未朔呂文煥入朝授侍衛親軍都指揮使襄漢大都督罷中興河南兩路行省命史天澤阿朮阿里海牙行荆湖樞密院事鎮襄陽合荅劉整塔出董文炳行淮西樞密院事守正陽爲滅宋計丁酉敕南儒破人略賣者官贖爲民辛丑罷四川行省入西川行院別置東川行院於重慶五月壬子朔詔天下獄囚除殺人者待報其餘槩行疏放限八月內如期自至大都六月丁亥免大都南京兩路賦役以紓民力汰陝西貧難軍甲午改資用庫爲利用監閏月己巳罷東西兩川統軍司秋七月辛巳許衡乞罷丙戌敕襄陽生券軍無妻子者赴京老疾者遣還家庚寅省西涼府入永昌路是月霖雨享祭山川嶽鎮海

元史卷五

本紀

三

瀆社稷宗廟八月庚戌朔高麗遣使賀聖誕節後每歲皆至不書赦諸路罪囚自至大都就獄者二十二入九月辛巳以合伯平章政事甲申生券軍至大都詔釋其械俾從征日本人各賜鈔娶妻丙戌以王恂主國學增置生員設東宮宮師府詹事以次官屬己丑敕自今秋獵鹿豕先薦太廟冬十月庚申命合荅帶爲御史大夫出御史臺贓罰鈔振貧民升襄陽府爲路初建正殿寢殿香閣周廡兩翼室皇子奧魯赤改建都禽其長下濟等四人建都降立寧遠都護府大司農言畿內秋刃始收請禁民覆耕恐妨芻牧帝以農事有益不許十二月己酉朔省陝州虢略朱陽三縣入靈寶罷西夏世官是歲諸路蟲蝻災霖雨害稼振米凡五十四萬五千五百九十石免民代輸僉軍絲銀及

伐木夫戶稅負前朝官錢毋徵

十一年甲戌宋度宗咸淳十年也春正月己卯朔宮闕告成帝始御正殿受朝賀庚寅初立軍官以功升散官格自龍虎上將軍以下至進義副尉凡三十四階丙午免于闡采玉工差役阿里海牙阿朮入覲力言江南可下宋室可平帝命史天澤伯顏專征僉軍十萬人蓋之二月戊申朔立儀鸞局掌宮門管鑰供帳燈燭甲寅太陰犯井壬申起廉希憲爲北京行省右丞三月庚寅移四川礪門兵戍哈荅城辛卯改荆湖淮西二行院爲行省伯顏史天澤竝爲左丞相阿朮平章政事阿里海牙爲右丞呂文煥參知政事行省荆湖合荅爲左丞相劉整爲左丞塔出董文炳參知政事行省淮西癸巳改金州招討司爲萬戶府遣使招

元史卷五

本紀

五

諭入魯國夏四月辛亥分陝西隴右諸州置提刑按察司治鞏昌癸丑初建東宮辛未詔安諭幹端鴉兒看合失合兒等城諭丞相合荅先守沿江堡隘爲使傳往來之衛仍分兵掠荆南鴉山以綴宋之西兵六月庚申聲罪伐宋詔統軍官曰爰自太祖以來彼宋與我使介交通殆非一日彼此曲直之情亦所共知不必歷舉迨我憲宗御世朕以藩服奉命南伐師次鄂渚彼賈似道再遣宋京詣軍前請罷兵息民願奉歲幣朕以國之大事宗親在上必須入計用報而還卽位之始追憶是言乃命郝經等持書往聘蓋爲生靈計也古者兵交使在其間惟和與戰宐嗣報音其何與於使哉而乃執之卒不復命羈此一介行李於彼何益於此何損以致師出連年邊境之間死傷相藉繫累相

屬皆宋自禍其民耳襄陽被圍五年旅拒王師義當不貸朕先有成命果能出降許以不死是以既降之後朕不食言悉全其命冀宋悔過或啟合圖而乃執迷罔有悛心此問罪之師有不能已者夫以天下爲念爰及干戈自古有之無辜之民初無與焉若彼界官民有能去逆效順與眾來降或別立功績者驗等第官資遷賞所附軍民爾等宜嚴敕將士毋得妄行殺掠仍加振給令得存濟其或負固弗從及抗拒迎敵者俘戮何疑甲子分遣忙古帶帥武衛軍南征秋七月乙未伯顏陛辭帝曰古之善取江南者惟曹彬一人汝能不殺是吾曹彬也宋主禛崩太子熈嗣改元德祐八月丁未從史天澤言以荆湖淮西各置行省事權難一復改淮西行省爲行樞密院天澤至中途有疾而

元史卷五 本紀

五

還詔太原新僉軍遠成兩川遣使分括廩粟給其家九月癸巳軍次鹽山距郢州二十里宋兵當郢夾漢城萬勝堡南岸戰艦千艘鐵紼橫江遏我舟師不得下惟黃家灣有溪經鶴子山入唐港可達江宋又築壩置堡其處駐兵固守伯顏督諸軍攻拔其堡鑿壩挽舟入溪出唐港整列而進冬十月壬戌歲星犯壘壁陣乙丑伯顏督諸將破沙洋堡進次新城宋統制黃順縋城降都統邊居諒自焚死趙文義戰死十一月乙酉師次復州宋安撫翟貴降癸巳東川元帥楊文安拔宋雲安羅拱高陽城堡壬寅起閣南直大殿及東西殿增選樂工八百隸教坊十二月丙午軍次漢宋軍守陽邏堡以掘中流伯顏用千戶馬福計自漢口開壩引船會淪河趨沙蕪徑入大江乙卯阿里海牙進軍

青山磯破武磯堡己未伯顏次鄂州宋權守張晏然都統程鵬飛知漢陽軍王儀知德安府來興國竝以城降伯顏留阿里海牙鎮鄂州規取荆湖而自與阿朮將諸軍水陸東下癸亥增置歸德永城縣省長武縣入涇川良原縣入靈臺是歲諸路好蚘等蟲災振米粟凡十二萬餘石天下戶一百九十六萬七千八百九十

十二年乙亥宋主熈德祐元年也春正月甲戌師次黃州宋制置陳奕及其子知安東州巖皆以州降乙亥東川副元帥張德潤拔禮義城宋安撫張資死之癸未師次蘄州宋安撫管景模獻城丙戌次江州宋知江州錢真孫呂師夔知南康軍葉闡六安軍曹明竝迎降己丑選蒙古漢人有才者赴軍前爲新附州郡民官乙未遣尙書廉希賢待

元史卷五

本紀

三

郎嚴忠範祕書監柴紫芝至宋己亥置雲南郡縣長及規措所二月癸卯師次安慶宋知府事范文虎出降甲辰命博魯歡爲淮南都元帥會各部兵於邳州丙午伯顏師次池州宋統制張林以城降權州事趙昴發死之丁未禁無籍自效軍俘掠新附軍民戊申詔諭江黃鄂岳漢陽安慶諸處歸附士民軍匠僧道人等令農者就耒商者就途士庶緇黃各安己業如鎮守官吏安有騷擾許詣行省陳告庚申召降臣張晏然赴闕帝曰朕省卿奏云宋之權臣不踐舊約拘留使者實非宋主之罪儒蒙聖慈止罪擅命之臣庶令趙氏有祀卿言良是卿旣不忘舊主必能輔弼我朝比令伯顏按兵不動仍遣廉希賢等持書往使果能悔過來附旣往之愆朕復何究卽權臣賈似道尙不欲加罪

況肯令趙氏乏祀乎若其執迷罔悛未然之事朕將何言
天其鑒之辛酉師次丁家洲宋相賈似道親督步帥孫虎
臣淮西制置夏貴操戰艦橫互江中伯顏分步騎夾岸而
進舉巨礮擊之宋兵大潰似道走揚州甲子師次蕪湖宋
知無爲軍劉權知大平州孟之縉降博魯歡軍下邳宋西
海州安撫丁順降乙丑阿里海牙取江陵下岳州宋統制
孟之紹舉城降戊辰師次采石宋知和州王善宋史作善降博
魯歡次漣水宋知安東州孫嗣武降庚午師次建康宋都
統徐王榮翁福茅世雄曹旺俱以城降賈似道至揚州始
送郝經劉人傑歸國命北平王南木合出鎮阿力麻里之
地丞相安童行省院事往輔之以防海都三月壬申朔宋
鎮江統制石祖忠江陰軍僉判李世修相繼納款乙亥分

元史卷五 本紀

七

兵徇饒州宋知州唐震故相江萬里死之敕安西王芑兀
刺分軍從西平王奧魯赤征吐蕃丙子廉希賢等至建康
傳旨令諸將各守營壘無妄侵掠己卯升平陰縣新鎮寨
爲肥城縣庚辰宋知寧國府顏紹鄉知滁州王文虎以城
降江東平得府二州五軍二縣四十三甲申置懷遠靈武
二縣於中興路分處新民丙戌師至常州宋鈐轄戴之泰
通判王虎臣以城降廉希賢等至獨松關爲宋人所殺丙
申四川側布番官稅昔確州番官莊竈等率四十三族詣
行院款附庚子分置翰林院專掌蒙古文字其翰林兼國
史院職修國史典制誥備顧問辛丑命阿朮分兵取揚州
有二星鬪於中天一星隕夏四月壬寅朔改西夏中興道
按察司爲隴右河西道丙午阿里海牙軍至江陵宋荊湖

宣撫朱禕孫制置使高達知荆門軍劉懋湖北提刑青陽
夢炎李湜俱出降遂入江陵分道招諭未下州郡峽歸澧
等州常德府新舊城各守臣以次歸順辛酉宋郢復二州
安撫趙孟程貴五郡鎮撫呂文福竝以城降癸亥阿朮駐
師瓜洲宋兵盡焚廬舍遷其民以去丙寅立尙牧監免京
畿西京陝西今歲絲銀丁卯命李羅爲御史大夫罷隨路
巡行勸農官以按察司兼勸農事增副使僉事二員庚午
師克沙市屠其城宋都統孟玘監鎮司馬夢求死之五月
辛未朔阿里海牙還鄂州以廉希憲行省江陵庚辰遣高
達安撫湖南帝曰昔我國家出征所獲城邑卽委而去之
未嘗畱兵戍守以故連年征伐不息夫爭國家者取其土
地人民而已得地無民其誰與居今務保守城邑使百姓

元史卷五

本紀

五

安居力農湖南州郡皆汝舊部曲未歸者作何招懷新附
者作何安集汝必熟知其事聽汝爲之辛巳宋辰隨均沅
靖房六州守臣皆降荆南湖北平得府三州十一軍四縣
五十七丁亥召伯顏赴闕壬辰宋統制劉師勇殿帥張彥
王安節據常州推姚訔爲守六月庚子朔日食旣晝晦如
夜星見雞鷺皆歸宋嘉定安撫咎萬壽以城降賜名順命
僉四川行院事戊午招諭宋四川制置使趙定應曰比者
青陽夢炎赴闕面陳蜀省事宜奏請緩師令自納款姑從
所請今遣招討使畢再興宣布大信若能順時達變可保
富貴無爲塗炭生靈自貽後悔辛酉宋潼川安撫梅應春
來降戊辰罷山東經略司秋七月庚午朔阿朮集行省諸
翼萬戶兵船於瓜洲阿塔海董文炳集行院諸翼萬戶於

西津渡宋沿江制置使趙潛樞密都承旨張世傑知秦州
孫虎臣陳舟師於焦山南北阿朮分遣水軍萬戶劉琛循
江南岸東趨夾灘繞出敵後文炳直抵焦山南麓以倚其
右招討使劉國傑趨其左萬戶忽刺出擣其中堅張弘範
自上流趨焦山北大戰乘風縱火焚其舟宋師大敗世傑
虎臣走追至圖山獲黃鵠白鶴船數百艘宋自此不能軍
癸酉太白犯井癸未分命伯顏趨臨安阿里海牙取湖南
阿朮攻淮南萬戶宋都帶李恆尙書呂師夔等取江西罷
淮西行院以阿塔海董文炳同署省事辛卯太陰犯畢甲
午進伯顏右丞相阿朮左丞相詔僉雲南落落蒲納烘等
皆軍萬人取察罕章未附種落增置燕南河北道提刑按
察司八月癸卯伯顏陛辭帝曰若宋君臣相率來附則趙

元史卷五

本紀

五

氏族屬可保無虞宗廟悉許如故可持詔往諭己未升任
城縣爲濟州九月己巳太白犯少民庚午從阿合馬請以
軍興國用不足復立都轉運司九諸路轉運司十一濫增
課程己卯太白犯太微西垣上將乙酉罷襄陽統軍司丙
申命玉昔爲御史大夫括江南諸郡書版及臨安祕書省
乾坤寶典諸書冬十月戊戌朔享太廟牲仍用牛癸丑太
陰犯畢十一月丁卯阿里海牙圍潭州乙亥伯顏分兵三
道趨臨安阿剌罕率步騎自建康四安廣德出獨松關董
文炳率舟師循海由澈浦至浙江伯顏與阿塔海居中節
度諸軍期並會臨安己卯宋都帶次龍興宋轉運判官劉
槃降都統密佑不屈死江西諸郡相繼歸附得府州六軍
四縣五十六壬午伯顏屠常州宋守臣姚峕陳炤王安節

皆死之劉師勇奔平江改順天爲保定府乙酉阿剌罕克廣德知軍令狐槩降丙戌太陰犯軒轅大星庚寅伯顏遣降人游介實奉璽書副本至宋十二月戊戌填星犯亢辛丑董文炳次許浦宋都統祁安以本軍降甲辰伯顏次平江宋都統王邦傑知府潛說友通判王矩之迎降丁未改諸站提領司爲通政院整飾諸譯戍申太陰犯畢宋主遣右史陸秀夫奉書尊帝爲伯父世守子姪禮請和伯顏不許丙寅阿剌罕次安吉宋安撫趙與可以州降置四川馬湖路省重慶路隆化縣入南川瀘州海山縣入昌黎復置華州鄭縣蘄州平谷縣是月祀天始用香酒脯饗行一獻禮用呂文煥言始榷江西茶是歲天下戶四百七十六萬四千七十七

元史卷五 本紀

三

十三年丙子春正月丁卯朔阿里海牙克潭州宋安撫李芾知衡州尹穀闔室自焚死轉運使鍾蜚英都統陳義自殺參議楊霆赴水死湖南平得府一州六軍二縣四十伯顏次嘉興宋安撫劉漢傑出降董文炳至乍浦宋統制劉英以本軍降辛未文炳至海鹽守臣王與賢胡全沈世隆皆降壬申立回易庫於諸路掌市易幣帛諸物辛巳伯顏次崇德宋相陳宐中遣侍郎劉廷瑞等來返且約面議降事甲申伯顏至皋亭山董文炳阿剌罕以兵來會宐中違約不至宋主遣使齎傳國璽及降表詣軍前其辭曰大宋國主累謹奉表於大元仁明神武皇帝陛下累眇焉幼冲遭家多難權奸賈似道背盟誤國至勤興師問罪累非不欲遷避以求苟全自知天命有歸避將焉往惟是世傳鎮

寶不敢愛惜謹奉太皇太后命戒痛自貶損削去帝號以兩浙福建江東西湖南二廣四川見存州郡悉上聖朝爲宗社生靈祈哀請命伏望聖慈矜全不忍暴三百年宗社遽至殞絕令趙氏子孫世世有賴不敢弭忘伯顏以其表不稱臣仍書宋號不受乙酉師次臨安北十五里宋陳宐中張世傑劉師勇等挾益廣二王出嘉會門渡浙江遁去輟耕錄云伯顏駐軍皋亭山遣千戶囊加台等入城慰諭令居民門首各貼好投拜三字及聞益王廣王如婺州卽命分兵屯守諸門時范文虎安營江許太皇太后望視曰海若有靈當使波濤大作一洗而空之無何潮汐三日不至軍馬丙戌宋主昀稱臣降表至己丑遣千戶囊加帶齋宴然

元史卷五

本紀

三

顏承制以臨安爲大都督府命忙古帶范文虎入視事兩浙平得府八州六軍一縣八十一辛丑師克臨江軍宋知軍陳元死之丁未慰諭臨安官吏軍民詔曰聞者丞相伯顏上奏宋母后幼主暨諸大臣百官已於正月十八日齋璽綬奉表降附朕惟自古降王必有入覲之禮已遣使特往迎致爾等各守職業勿復妄生疑畏凡歸附以前犯罪悉從原免公私逋欠不得徵理一應抗拒王師及逃亡嘯聚者竝赦其罪百官有司諸王邸第三學寺監祕省史館及禁衛諸司各宜安居州郡官吏勿得依殘宋故事擅自科斂所有山林河泊薪木花果魚蝦菱芡諸物聽民采取權免徵稅太常寺祭器樂具法服樂工鹵簿儀衛宗正譜牒天文地理圖書及典故文字戶口版籍盡數收取前代

聖賢之後及高尚儒醫僧道卜筮通曉麻數竝山林隱逸名士窮居不能自達者所在官司具以名聞名山大川寺廟或歷代名人遺蹟不許侵毀鰥寡孤獨不能自存者量加贍給且命伯顏入宋宮收衮冕圭璧符璽及宮中寶玩車輅輦乘麾仗等物戊午宋制置使夏貴以淮西降得府二州六軍四縣三十四三月戊辰禁江南及西番僧持軍器甲戌宋宗長福王與芮來軍中文天祥自鎮江入真州乙亥伯顏發臨安北還畱忙兀台鎮浙西唆都鎮浙東董文炳阿剌罕經略浙閩丁丑阿剌罕等入宋宮宣詔趨宋主入覲宣讀至免繫頸牽羊之語宋太后全氏泣謂宋主曰荷天子聖慈活汝當望闕拜謝拜畢子母肩輿出宮唯太皇太后謝氏以疾暫畱戊寅立淮西廬州總管萬戶

元史卷五

本紀

三

府乙酉吉袁贛南安四郡來歸閏月丙申置宣慰司於濟寧路主印造交鈔供江南軍儲立尙珍署收掌濟寧諸處子粒供酒材汪惟正略地涪州克山寨谿洞二十三所甲子以郝禎參知政事夏四月乙丑朔省東川行樞密院及成都經略司入西川行院己卯以侍衛親軍征戍久放令還家期以六月各赴軍五月乙未朔宋主熈至上都降封瀛國公

命宰相出通州迎黃羅張幔先燕三宮於會同館然後十次開筵月支糧萬石日支食肉六十斤

以平宋遣官告天地祖宗於上都之近郊宋益王昞稱帝於福州癸卯復沂莒膠密寧海五州所括防城軍爲民免其租徭二年己巳阿朮遣兵攻拔秦州之新城丁未宋揚州都統姜才攻灣頭堡親軍千戶董士元戰死戊申改博州爲東昌路升閬州爲保寧府六月甲子朔以孔子五十

三世孫曲阜縣尹孔治兼權主祀事己巳置行戶部於大名造交鈔通江南貿易宋江西制置黃萬石以其軍來降辛未命阿里海牙征廣西罷兩浙大都督府建行尚書省於鄂州臨安王申設諸路宣慰司以行省官爲之竝帶相銜其己立行省者不更設宣慰司甲戌命贊善王恂都水少監郭守敬更造新厯復召許衡赴京商訂戊寅詔作平金平宋錄及諸國臣服傳記壬辰宋淮東制置使李庭芝畱安撫朱煥守揚州與姜才率步騎東走泰州阿朮分道追及圍之秋七月乙巳朱煥以揚州降乙卯宋泰州守將孫良臣獻城李庭芝姜才被執不屈斬之師入眞州宋守將苗再成死之通滁高郵諸州相繼來附淮東平得州十六縣三十三八月己巳敕漢軍都元帥李庭將侍衛軍征

元史卷五

本紀

五

河西庚辰以銅爵一豆二獻於太廟敕常饌外益以野豕鹿羊蒲萄酒宋太皇太后謝氏至燕降封壽春郡夫人九月壬辰朔改作太廟金主太祖主題曰成吉思皇帝睿宗主題曰太上皇耶可那顏皇后皆題名氏癸卯以平宋大赦天下丙午敕常德府歲貢包茅丁未墮沿淮及襄漢荆湖諸城甲寅太白入南斗乙卯升吐蕃哈答城爲寧遠府辛酉阿朮入覲奏得江淮及浙東西湖南北府三十七州一百二十八關一監一縣七百三十三冬十月戊子諸軍分道取閩廣命阿剌罕董文炳忙兀台梭都以舟師出明州塔出呂師夔李恆以騎兵出江西十一月戊申阿剌罕克處州宋秀王與釋觀察使李世達監軍趙由瑒察訪使林溫被執皆不屈死旋破建寧府邵武軍壬子賜龍峇溫

軍有功者鈔帛宋主昱航海趨潮州癸丑阿剌罕軍至福州宋招捕使王積翁爲內應府尹王剛中迎降乙卯太陰犯填星敕管民官及理財官由中書省銓調軍官由樞密院定擬十二月辛酉朔熒惑掩鉤鈴丁卯改雲南蘿蔔甸爲元江府路滇志作蘿鬱戊辰宋提舉市舶使蒲壽庚以泉州降遂徇興化軍宋知軍陳文龍被械死宋主昱次惠州甲子門遣倪宙奉表詣軍前請降壬申有告運使姜毅所言多不軌指毅妻子爲證帝曰妻子豈爲證者邪置弗問庚寅詔諭新附府州軍縣官吏軍民曰昔以萬戶千戶漁奪其民致令逃散今悉以人民歸元籍州縣凡管軍將校及宋官吏向有以勢奪民田廬者俾各還本主無主則以給附近民之無產者其田租商稅茶鹽酒醋金銀鐵冶竹貨

元史卷五

本紀

五

湖泊課程從實辦納故宋繁冗科差如聖節上供經總制錢等百有餘條悉與除豁改瑞安府爲溫州隴州爲散府鮑州復置豐潤縣升鄆陰縣爲鄆州臨洮渭源堡爲縣分立東西二川行樞密院以合丹闊里吉思領東院攻合州不花李德輝領西院攻重慶阿里海牙破靜江宋守帥馬暨黃文政張虎提刑鄧德遇俱死之廣西州郡皆下是歲東平濟南泰安德州安東海州清河平灤西京等州皆水旱缺倉振軍民站戶米二十二萬五千五百六十石粟四萬七千七百七十二石鈔四千二百八十二錠有奇天下戶一千五百七十八萬八千九百四十一戶十四年丁丑春正月癸巳進軍廣東宋循梅二州守臣劉興錢榮之迎降新會合會逢龍東莞義民熊飛戰死丙申

以江南平百姓疲於軍供免今歲絲銀召天師三十六代
孫張宗演至京賜號演道靈應沖和真人還江南領諸路
道教置江淮都轉運鹽司及權茶轉運司丙辰阿剌罕破
汀關宋汀守黃去疾監軍吳浚竝降二月癸亥彗星出東
北長四尺餘宋瑞州安撫姚文龍張文顯來降其家屬爲
宋所害各賜鈔優之壬午墮江西諸城惟隆興濱江仍舊
丁亥宋知南恩州陳堯道僉判林叔虎涪州陽立各以城
降命李羅爲樞密副使兼宣徽使領侍儀司事遣吳浚至
漳州說文天祥天祥斬之三月辛卯以廣西二十四郡歸
附復建行省於潭州置廣南西路宣撫司於靜江癸巳敕
行都水監兼領漕運乙未宋建寧漳泉等郡守臣邱德傅
李珪郭贊李公度皆以城降壬寅克廣東肇慶府新封等

元史卷五

本紀

三

州乙巳命中外官所佩金銀符用色組繫於肩腋以免褻
瀆著爲令庚戌四川南平軍都掌蠻羅計蠻及鳳皇中壠
羅韋高厓四砦與播州土官楊邦憲思州土官田景賢相
繼送款癸丑命汪惟正自東川移鎮鞏昌廣南西路慶遠
鬱林昭賀藤梧融賓柳象豈廉容貴潯悉平得府一州十
四復設襄陽南漳二縣升崇明沙爲州夏四月甲子宋特
磨道將軍農士貴安平州李惟屏來安州岑從毅以所屬
溪洞百四十七來附癸酉省各路轉運司入總管府設鹽
轉運司四置權場於礪門黎州與吐蕃貿易丙戌禁江南
行用銅錢五月癸巳京畿不雨嚴酒禁犯者籍其家癸卯
立廣西欽橫二州安撫司敕江淮新附官三品以上各遣
質子一人入侍西番長阿立丁寧占等三十一族來附辛

亥河南山東饑弛河泊禁乙卯選蒙古漢軍相參宿衛秋七月戊子朔罷大名濟寧印鈔局丁酉敕自今非佩符使臣及軍情急速不聽乘傳癸卯諸王昔里吉劫北平王南木合囚丞相安童脅諸王以叛使通好海都海都不納遂率西道兵至和林城北帝命伯顏往擊大破之諸王忽魯帶率其屬來歸與伯顏軍合乙巳宋張世傑復入邵武軍丙午初立行御史臺於揚州統淮東淮西湖北浙東浙西江東江西湖南八道每道各增置提刑按察司仍總居內臺令彈劾行省宣慰管軍管屯諸色官吏非違命相威爲御史大夫設行臺監察御史立行中書省於江西以塔出爲右丞呂文煥爲左丞張榮實李恆耶的迷失程鵬飛蒲壽庚竝參知政事帥師定閩廣壬子權大都商稅八月戊

元史卷五

本紀

美

午朔新建太廟於大都李恆自將攻文天祥於興國天祥走至空坑得脫裨將鞏信力戰死招討使趙時賞被禽九月丙申廣南東路廣連韶德惠湖南雄英德等郡皆平戊申耶的迷失復破邵武軍入福州宋主昞次廣州之淺灣詔塔出與李恆呂師夔以步卒出大庾嶺忙兀帶梭都蒲壽庚及元帥劉深等以舟師下海合追宋二王冬十月丙辰朔日食甲申塔海略地至夔府毀其城梭都破興化軍獲守帥陳瓚車裂之屠其民十一月戊子文天祥與其徒趙孟潛復起兵行省發兵攻之孟潛被殺天祥僅以身免執其妻子赴京師乙未定僞造寶鈔同情者竝死改稱宋曰亡宋行在曰杭州劉深攻宋主昞於淺灣張世傑退保秀山十二月丁卯以大都物價翔踊發官廩萬石振糶

貧民庚午梁山軍袁世安以其城及金石城軍民來降乙亥導任河復民田三千餘頃以耿仁參知政事是歲振東平濟南等郡饑民米三萬一千餘石粟二萬八千石鈔萬有百錠

十五年戊寅春正月辛卯遣阿老瓦丁將兵戍斡端城已

亥禁軍民略賣良家子女賜湖州長興縣金沙泉名瑞應

泉唐時用此水造紫筍茶進貢有司具牲幣祭之始得水致事訖輒涸宋未屢加浚治泉迄不出至是中書省遣官田千畝因賜今名丙午萬戶圖滿荅爾克瀘州宋安撫

王世昌死之戊申降封宋福王趙與芮平原郡公庚戌東

川副都元帥張德潤大敗涪州兵州將王明及其子忠訓

總管韓文廣張遇春皆死之二月西川行院不花圍重慶

宋守將張玘屢敗所部開門納降玘潛遁至涪元帥張德

元史卷五 本紀

三

潤邀禽之明年玘行至安西自經死此事据宋史書之元且誣玘出降與元史汪良臣及紐璘傳亦不合且舊本紀於上年禽玘之後七月始書張德潤破涪八月始書詔不

花行院西川亦前戊午祀先農令蒙古胄子代耕籍田癸亥升華亭縣爲松江府復立河中府萬泉縣辛未以蜀地多嵐瘴弛酒禁丁丑熒惑犯天街壬午梭都攻潮州屠其

民知州馬發死之置太史院掌天文麻法以祭酒許衡兼

領三月乙酉命忙兀帶梭都蒲壽庚行省福州鎮撫瀕海

諸郡合刺帶爲沿海經略使帥舟師南征丁亥太陰犯太

白戊子犯熒惑甲午西川行院招降重慶等處得府三州

六軍一監一縣二十柵四十蠻夷司一竝招宥勝土恢等

城及石樞寨相繼來降壬寅詔諸路歲比不登免今年田

租絲銀乙巳楊文安克咸淳紹慶二州斬郡守鮮龍廣南

宣慰使招降雷化高三州宋主昱奔化州之碭洲尋歿廣
王昺嗣立夏四月乙卯敕修會川縣盤古氏祠以時雨霑
足弛酒禁民衰疾者官爲醞釀量給之戊午以江南土寇
竊發遣官分道撫治檢覈錢穀察郡縣災傷吏廉能者舉
以聞其貪殘不勝任者劾罷丁丑雲南行省招降臨安白
衣和泥分地城寨百有九所威楚金齒落落分地城寨軍
民三萬二千二百戶秃老蠻高州筠連州等城寨十九所
壬午立行中書省於建康敕自今罷免之官宰執爲宣慰
宣慰爲路官路官爲州官以淮浙鹽課直隸行省宣慰官
勿預改北京行省爲宣慰司五月癸未朔定武官承襲制
凡主兵官有功升秩者其原職不得令子孫復任惟陣亡
者始得襲本職病故者授官降一等總把百戶老死者不

元史卷五

本紀

五

襲具爲令甲午敕諸職官犯罪受宣者聞奏受敕者從行
臺處治受省劄者按察使處治其宣慰司案牘聽本道按
察使磨刷一應罪犯有司勘明俟按察使審覆依例彙奏
自行省以下公務小事七日中午十五日大事三十日爲
限乙未改烏蒙路隸雲南六月乙卯升西番李唐城爲州
濟南府爲路降西涼府爲州宋主昺徙居新會之崖山丁
卯置甘州和羅提舉司以備軍餉振貧民甲戌汰江南宄
官淮西宣慰使昂吉爾入覲言阿合馬所立江西樵茶運
司及諸路轉運提舉等官多至五百餘人帝顧謂左右曰
江南官吏太宄省臣姚樞輩知而不言昂吉爾乃爲朕言
之近侍因奏阿里海牙屬吏張鼎其人亦參政矣帝卽命
罷斥傳旨省院臺及翰林院今爲行省宣慰及各路達魯

花赤佩金虎符者多謬濫可大加裁汰於是龍興省并
入福建仍削各官所帶相銜罷榷茶營田司歸本道宣慰
司漕運司歸行省各路總管府計戶數多寡分上中下三
等設官改江南總管府爲散府者七爲州者一散府爲州
者二乙亥敕諸司奏事必登起居注戊寅全州西延溪洞
獠蠻二十所內附己卯命張弘範爲蒙古漢軍都元帥李
恆副之由海道討宋餘眾秋七月壬午朔宋湖南制置張
烈良提刑劉應龍起兵應厓山阿里海牙追襲之二人皆
戰死甲申增行臺監察御史四員江南湖北道嶺南廣西
道福建廣東道竝設提刑按察司改京兆府爲安西府大
倉爲御廩資成庫爲尙用監并皮貨局入總管府丙申復
建行省於贛州轄福建江西廣東諸道八月壬子朔追毀

元史卷五

本紀

五

宋故官所受告身壬戌漳州安撫使沈世隆守建寧降人
郭贊持張世傑僞檄至世隆執斬之行省謂世隆擅殺籍
其家帝曰世隆何罪命還其貲仍授本路管民總管甲戌
以川蜀山寨搖洞旣平其渠州禮義等城仍畱兵鎮守餘
悉徹毀己卯立提刑按察司於畏吾兒分地辛巳升洛磁
爲廣平府諭行省梭都蒲壽庚曰東南島嶼諸國尙有慕
義之心可因番舶諸人宣布德意誠能來朝朕將寵禮之
其往來互市俾各從所願九月壬午朔省東西川二行院
其成都潼川重慶利州設四宣慰司戊子分揀諸路所括
軍爲民冬十月己巳張弘範統舟師由海道襲漳潮惠三
州李恆時將步騎由梅嶺襲廣州廣南諸郡相繼復爲宋
陷庚午徙河南北道按察司治南京十一月丁亥以辰沅

靖鎮遠等郡蠻獠接壤民不安業命塔海程鵬飛竝爲荆
湖北道宣慰使置司常德路壬辰阿里海牙略地至瓊州
宋安撫使趙與珞再安國黃之傑皆死之己亥定己除官
不之任者竝削籍辛丑建寧人黃華集鹽夫及畚民爲亂
丁未移浙江行省治杭州立淮東宣慰司於揚州閏月庚
戌朔羅施鬼國王阿榨內附立羅甸軍民安撫司辛亥太
白熒惑填星聚於房甲寅置光祿寺領尙飲尙醞等局癸
亥李恆入廣州張弘範攻漳州得山寨百五十戶百萬十
二月己丑授西南番阿永都掌蠻得蘭紐竝安撫使丙申
從播州安撫楊邦憲請以鼎山縣仍隸播州尋改播川縣
壬寅張弘範屯潮陽文天祥走五坡嶺遣前鋒張弘正追
執之送大都丙午禁玉泉山樵采漁弋戊申追封伯夷昭

元史卷五

本紀

四

義清惠公叔齊崇讓仁惠公加封程顥豫國公程頤洛國
公置屯田總管府於開成路復臨淄臨朐清河爲縣導肥
河入於鄆淤陂盡爲良田會諸王於大都分賜宋寶玉器
幣

09836

